

**Uunga siunnersuut:****Inuit innarluutillit tapersorneqarnissaanut Inatsisartut inatsisaat****Kapitali 1***Siunertaq, nassuiaatit, sullinniakkallu**Siunertaq*

§ 1. Inatsit manna naapertorlugu inunnut timikkut tarnikkulluunniit pisinnaasakinnerulersimasunut tapersersuisarnissami inuit innarluutillit tamarnik allat assigalugit inunnut pisinnaatitaaffinnik tunngaviusumillu kiffaanngissuseqarnissamut pisinnaatitaaffinnik tamakkiisumik pissarsisarnissaanut siuarsaanissaq, illersuinissaq periarfissaqartitsinissarlu siunertaavoq.

*Imm. 2.* Inuk innarluutilik pineqartoq ataqatigiissumik tamakkiisumillu isiginnilluni suliniuteqarfigineqassaaq, suliniuteqarnermilu pineqartup pisariaqartitai naapertuutissapput. Inunnut ataasiakkaanut periarfissaappat, ineriartorsinnaanissaanik aamma pisinnaasai naapertorlugit periarfissaqarfiinik atorluaasinnaanissamik siunertalimmik tapersersuineq tunniunneqassaaq. Taamatuttaaq siunertaavoq pineqartup mannakkut pisinnaasakkut killiffimminik pigisaqaannarnissaata imaluunniit pisinnaasaata appasinnerulernerata annikisinnissaata taperserneqarnissaa aammalu taarsiinikkut, isumassuinikkut paaqutaqarnikkullu tapersorneqarnissaa anguniarneqartussaavoq. Inunnut innarluutilinnut suliniuteqarnermi:

- 1) inuit innarluutillit siunnersuinermit tapersersuinermillu neqeroorfiginissaat qulakkeerneqassaaq,
- 2) pineqartup unammillernartitaasa ajorteriarnissaat pitsaaliorneqassapput kiisalu siusissukkut iliussissat ataqatigiissarneqassapput
- 3) inuit ataasiakkaat nukissaminnik pigisaqaannarnissaasa, nammineernerulernissamut siuarsaanissamut periarfissai tapersorneqassapput kiisalu pineqartup inuuniarnikkut inuttullu pisinnaasai pitsanngorsaaffigineqassapput,
- 4) katerisimaartarnerit, sammisaqartarnerit, katsorsartinnerit, isumassuinerit paaqutarinninnerillu pillugit attaveqatigiinnerit aqqutigalugit pineqartup akornuteqarnani inuuniarnissaanut periarfissai pitsanngorsarneqassapput,
- 5) inuiaqatigiinnut ilaalernissaq siuarsaaffigineqassaaq, soorlu pineqartup ilinniarnermut inuttullu attaveqarfinnut peqataasarnissaanut periarfissai annertusaaqataaffigalugit,
- 6) inuit innarluutillit suliffeqarfinnut isernissaanut suliinnarnissaannullu tapersorneqassapput aamma
- 7) nammineerluni inissiami, soorlu najugaqarfissatut neqeroorummi, pineqartup immikkut pisariaqartitai malillugit neqeroorutininik naleqqussaalluni tamakkiisumik tapersersuinermit qulakkeerinntoqassaaq.

*Nassuiaatit*

§ 2. Uani Inatsisartut inatsisaanni uku ima paasineqassapput:

- 1) Inuit innarluutillit tassaapput inuit ataavartumik timikkut, tarnikkut, silassorissutsikkut imaluunniit malugisaqarsinnaanikkut pisinnaanikinnerulersimasut, aporfimillu assigiinngitsut sunniivigeqatigiinnerisigut, allat assigalugit inuiaqatigiinni tamakkiisumik sunniuteqarluartumillu peqataanissaannut akornuserneqartut.
- 2) Ikorfartorti: inunnik innarluutilinnik ikorfartuisoq, isumaginninnermik inunnillu inarluutilinnillu suliaasaqarfanni sukumiisumik ilisimasalik misilittagaqartorlu, kiisalu isumaginninnermut aqutsisoqarfiup ikorfartortit pikkorissarnissamik neqeroorutaanik naammassinnissimasoq.
- 3) Najugaqarfissatut neqeroorut: najugaqaqatigiiffiit, najugaqarfiit nakkutigineqartut aamma ulloq unnuarlu neqeroorutit ilaapput.
- 4) Siusissukkut pinaveersaartitsineq: inuit ilisimasallit ajornartorsiutip pinngornissaata pinngitsoortinnissaanut maluginiagaqassapput.
- 5) Siusissukkut suliniuteqarneq: inuit suliamik ingerlatsisut sapinngisamik piffissaq eqqorlugu, ataqatigiissakkamik pitsaassusilimmillu suliniuteqarnissaannik kinguneqarpoq.
- 6) Malitseqartitsisarneq: inuusuttut 18-iniit 23-nut ukiullit inersimasunngornermut ikaarsaariarnissaannut kiisalu namminerisamik inuuneqalernissamat piareersarneqarnerat, tassunga ilanngullugit inuusuttup ineriartornerata atugarissaarneratalu, ilinniagaqarnerata, suliffeqarneratalu pissutsillu allat naleqquttut isiginiarneqarnerat, tassunga ilanngullugu namminerisamik inissiaqalerneq.
- 7) Kinguaassiuutitigut innarliineq: Inuk atoqatigineqartoq, inuup ukiuni paasinnittarnermilu pisinnaasani pissutigalugit kingunissaannik paasinnissinnaanngippat tamanillu takunnissinnaanngippat taamaammallu tamassumunnga akuersisinnaanani.

*Sullinniarneqartut*

§ 3. Inatsisartut inatsisaat manna inunnut innarluutilinnut Kalaallit Nunaanni najugalinnut ukiui apeqqutaatinnagit, ukiui pissutaallutik pisinnaasakinnerusunut utoqqaallu angerlarsimaffiini najugalinnut atuuppoq.

*Imm. 2.* Inatsisartut inatsisaat inunnut innarluutilinnut, Kalaallit Nunaanni isumaginninnermut oqartussat allaganngorlugu aalajangiinerisigut Kalaallit Nunaata avataani inissinneqartunut aamma atuuppoq tak. §§ 35-40.

§ 4. Meeqqat, Inatsisartut inatsisaat manna aammalu Meeqqat tapersorsorneqarnissaannut Inatsisartut inatsisaat malillugit tapersorsorneqarnissamik pisinnaatitaasut, Inatsisartut inatsisaat taakku marluk tunngavigalugit pisariaqartumik tapersorsorneqassapput.

Ataqatigiissaakkamik kiisalu meeqqamut pitsaanerpaasusaaq aallaavigalugu tapersersuisoqassaaq.

*Imm. 2.* Meeqqamut innarluutilimmut tapersersuinerup Inatsisartut inatsisaat manna malillugu aallartinneqartup, suliniutinut meeqqamut tassunga inatsisit allat malillugit aallartinneqartunut atassuteqartinneqarnissaa kommunalbestyrelsip isumagissavaa.

## **Kapitali 2**

### *Naalackersuisut akisussaaffii suliassallu agguataarnerat*

#### *Qitiusumik innersuussisarfik*

**§ 5.** Naalackersuisut qitiusumik innersuussisarfirmik (Qitiusumik Innersuussisarfik) ingerlatsissapput.

*Imm. 2.* Naalackersuisut qitiusumik innersuussisarfik pillugu malittarisassiorsinnaapput, tassunga ilanngullugit ulloq unnuarlu neqeroorutinut aamma Nuna Tamakkerlugu Innarluutilinnut Sullissivimmut innersuussisarnerit pillugit.

#### *Inissat pisariaqartut amerlassusaat*

**§ 6.** Inunnut innarluutilinnut ulloq unnuarlu neqeroorutini inissat pisariaqartinneqartut amerlassuseqarnissaat Naalackersuisut isumagissavaat.

#### *Pissassarfik*

**§ 7.** Naalackersuisut nuna tamakkerlugu innarluutilinnut sullissivik, Pissassarfik, ukuningga suliassaartoq ingerlatsissavaat:

- 1) inunnut innarluutilinnut taakkulu qanigisaannut Inatsisartut inatsisaat una pillugu siunnersuisarnek ilitersuisarnerlu, tassunga ilanngullugu tapersersuineq pillugu aalajangiinerit naammagittaalliuutigineqartarnissaannut periarfissaqarneq pillugu,
- 2) kommunalbestyrelsinut Inatsisartut inatsisaat manna pillugu siunnersuisarnek ilitersuisarnerlu, tassunga ilanngullugit tapersersuinissanut periarfissat suliassanillu suliarinnittarneq pillugit,
- 3) § 70 naapertorlugu inuup innarluutillip ulluinnarni sapinngisamik pitsaanerpaamik piginnaaneqarnissaa siunertaralugu, inunnut innarluutilinnut pisinnaanngorsarneqarnissamik pisinnaanngorsaqinneqarnissamillu neqerooruteqarneq,
- 4) inunnut innarluutilinnut tapersersuineq pissutsinillu ilisimasat pillugit sullissiviunissaq,
- 5) kommuninut, inunnut innarluutilinnut taakkulu qanigisaannut, innarluuteqarneq aamma tapersersuinissamut periarfissat pillugit pikkorissaanernik neqerooruteqarneq,
- 6) § 16 naapertorlugu, suliani immikkut pisariusuni kommunalbestyrelsemit qinnuivigineqarnikkut qulaajaaneq, aamma

7) § 41, imm. 4 naapertorlugu kommunalbestyrelsimit qinnuivigineqarnikkut qaammatisiutit malillugit ullunik 14-inik piffissaqarluni najugaqarfissatut neqeroorummiikkunnaarnissaq pillugu suliani oqaaseqaateqartarnek.

*Imm. 2.* Naalakkersuisut kommunalbestyrelsep Pissassarfimmik atuineranut akigititat pillugit malittarisassanik sukumiinerusunik aalajangersaasinnaapput.

**§ 8.** Kommunalbestyrelsep inuit pillugit paasissutissat ingerlateqqissinnaavai, tassunga ilanngullugit Pissassarfik § 7 naapertorlugu suliassanik suliarpap paasissutissat suliap sularineqarneranut pingaaruteqarpata inuit pillugit paasissutissanik mianernartunik Pissassarfimmut ingerlatitseqqiineq.

*Imm. 2.* Kommunalbestyrelsep imm. 1 malillugu inuk pillugu paasissutissat inuk suliami pineqartoq imaluunniit angajoqqaatut oqartussaassuseqartoq inummullunniit nakkutiginnissinnaasoq akuersiteqqaarlugit ingerlateqqissinnaavai, takujulli imm. 3.

*Imm. 3.* Kommunalbestyrelsep imm. 2 naapertorlugu akuersissut tunniunneqarumangippat, imaluunniit allanik pissuteqartumik akuersissummik pissarsinissaq periarfissaasimangippat, inuk pillugu paasissutissat ingerlateqqissinnaavai, tassunga aamma ilanngullugit suliami pissutsit inuup inatsisitigut illersorneqarnissaata mianerineqarnissaa tunngavissaqartippatigit inuk pillugu paasissutissat mianernartut, suliami pissutsit. Piumasaqaataavoq ingerlatitseqqiinermi inuup soqutigisai tunngavigineqassat, soqutigisallu isertuussinissamut tunngaviusut mianerineqarnissaat, tassunga ilanngullugu inuup paasissutissani pineqartup mianerineqarnissaa, ersarissumik qaangerneqarsimassat.

### **Kapitali 3**

*Kommunalbestyrelsip akisussaaffii suliassallu agguataarnerat*

*Kommunalbestyrelsip pingaarnertut pisussaaffia*

**§ 9.** Kommunalbestyrelse namminersorsinnaassutsimik attassiinnarnissamut siuarsaanissamullunniit kiisalu inuup innarluutillip inuttut atugai pisinnaasaalu pitsaanerulersinniarlugit tapersersuinissamik, isumassuinissamik, sungiusarnissamik ikiuinissamillu neqerooruteqassaaq.

*Siunnersuisarneq ilitsersuisarnerlu*

**§ 10.** Kommunalbestyrelsi inunnut innarluutilinnut inuillu innarluutillit qanigisaannut siunnersuisarlunilu ilitsersuisassaaq.

*Imm. 2.* Imm. 1 naapertorlugu siunnersuineq ilitsersuinerlu ilaatigut imatut ingerlanneqarsinnaavoq:

- 1) peqqissaalluni oqaloqatigiinnerit,
- 2) atortorissaarutit ikiuutit suut qinerneqarnissaannut siunnersuisarneq, aamma

3) atortorissaarutit ikiuutit atorneqarnissaannut ilitersuisarneq.

*Ikorfartorteqarnermik aaqqissuussineq*

**§ 11.** Kommunalbestyrelse inuup innarluutillip ikorfartortimit tapersorneqarnissamik neqeroorfigineqarnissaa siunertaralugu ikorfartorteqarnermik aaqqissuussinermik pilersitsissaaq:

- 1) Kommunalbestyrelsep Inatsisartut inatsisaat una malillugu tapersiineq pillugu suliamik suliarinninnerani,
- 2) Kommunalbestyrelsep Inatsisartut inatsisaat una malillugu tapersiinissaq pillugu aalajangigaanik naammagittaalliummik suliaqarnermi tunniussinermilu, aamma
- 3) Isumaginninnermi Naammagittaalliuuteqartarfiup Inatsisartut inatsisaat una malillugu tapersiinissaq pillugu aalangiineq pillugu naammagittaalliummik suliarinninnerani.

*Imm. 2.* Naalakkersuisut toqqaasarneq, aningaasarsiaqartitsineq, pinerluuteqarsimanginnermik allagartamik aamma meeqqanik innarliisimanginnermut uppersaammik piniartarneq, kiisalu ikorfartuisup piukkunnassusaanut pisinnaasaanullu piunasaqaatit piunasaqaataasussat pillugit maleruagassanik sukumiinerusunik aalajangersaasinnaapput.

*Siusissuklut iliuuseqarneq*

**§ 12.** Kommunalbestyrelse kommunip nalinginnaasumik pinaveersaartitsiffiusumillu suliaqarnerata aamma inunnut immikkut taperserneqarnissamik pisariaqartitsisunut anguniagaqarfiusumik suliniuteqarnerata akornanni ataqatigiittoqarnissaanik qulakkeerinniffiusumik iliuutsimik aalajangersaassaaq.

*Imm. 2.* Kommunalbestyrelsep siusissuklut pinaveersaartitsiffiusumik iliuuseqarnermini angajoqqaat meerartallit ilaqutariinni ajornartorsiutaasut qaanganiarnissaannut tunngatillugu ilaqutariit siunnersorneqarsinnaanerannik isumaginnissaaq. Kommunalbestyrelse ujartuilluni sulinermi ilaquttanut pissutsit immikkut ittut pissutigalugit pisariaqartitsisutut ilimagineqartunut kikkunnulluunniit taamatut siunnersuisarnermik neqeruussalluni pisussaaffeqarpoq. Angajoqqaat meeqqallu, inuusuttut inersimasullu kisimiillutik siunnersorneqarusuttut kinaaneq isertuullugu neqeroorutitullu ammasutut siunnersorneqarsinnaassapput.

*Imm. 3.* Kommunalbestyrelse imm. 4, nr. 1-4 malillugit tapersersuinermi inuup ilaqutariilluunniit pisariaqartitaat iliuuseqarfigineqarsinnaasutut nalilerneqarpat inummut immikkut tapersorneqarnissamik pisariaqartitsisumut ilaqutariinnulluunniit pinaveersaartitsilluni iliuuseqarnissamik neqeruussaaq.

*Imm. 4.* Kommunalbestyrelse iliuutsinik pinaveersaartitsiffiusunik ukuningga neqerooruteqarsinnaavoq:

- 1) Siunnersortimik ikiorneqarneq, tassunga ilanngullugit iliuutsit ilaqutariinnut tunngasut.

- 2) Attaveqatigiittarfiit imaluunniit oqaloqatigiittarfiit
- 3) Ilaqutariit pilersarusiornissaannut siunnersuineq.
- 4) Suliniutit allat inuup ilaqutariilluunniit ajornartorsiuteqalersinnaanerannik pinaveersaartitsinissamik siunertaqarfiusut.

*Tapersersorneqarnissamut periarfissat pisariaqartut najugaqarnissamullu neqeroorutit*

**§ 13.** Inuit innarluutillit pisariaqartumik taperserneqarnissaat aamma inunnut innarluutilinnut Inatsisartut inatsisaat una malillugu tapersiinissamut periarfissanik pisariaqartunik peqarnissaa kommunalbestyrelsep isumagissavaa.

**§ 14.** Kommunalbestyrelse inuit innarluutillit kapitali 10-mi aalajangersakkat malillugit taperserneqarnissaat pillugu imaluunniit kapitalit 4-mit 6-mut aalajangersakkat malillugit ineqarnissamik neqerooruteqarneq pillugu allaganngorlugu aalajangiissaaq. Aalajangiineq pisinnaavoq:

- 1) inummit innarluutilimmit,
- 2) taassuma nakkutilliisorisinnaasaanit,
- 3) angajoqqaatut oqartussaassusilimmit qinnuteqartoqarneratigut, imaluunniit
- 4) kommunalbestyrelsep nammineq iliuseqarneratigut.

*Imm. 2.* Imm. 1 malillugu aalajangiineq inuit innarluutillit ataasiakkaat pisariaqartitaannik pisinnaasaannillu immikkut nalilersuivinneq tunngavigalugu pissaaq. Inuk ataavartumik pisinnaanikinnerulersimanersoq kommunalbestyrelsep nalilersuinermini qulaajaaffigissavaa.

*Imm. 3.* Kommunalbestyrelsep imm. 1 naapertorlugu sulii aalajangiisoqartinnagu, inuk innarluutilik aamma angajoqqaatut oqartussaassusillit imaluunniit inuup innarluutillip nakkutilliisorisinnaasaa oqaloqatigereersimassavai.

*Imm. 4.* Kommunalbestyrelse pinartumik tapersersorneqarnissamik pisariaqartitsisoqartillugu tapersersuisoqarnissaa pillugu allaganngorlugu aalajangiissaaq, aalajangiinerullu kingorna nalunaaquttap akunnerisa 48-t iluanni § 46 malillugu oqaloqateqarsimannginneq apequtaatinnagu § 16 malillugu misissuineq aallartissallugu aammalu § 47 malillugu taakkuluunniit naammassisimatinnagit iliussissatut pilersarusiussalluni

*Imm. 5.* Kommunalbestyrelsep pisariaqanngitsumik uninngatinnani imm. 4 malillugu iliussissat aallartissavai:

- 1) oqaloqatiginnissaaq,
- 2) § 16 naapertorlugu qulaajaaneq aamma § 47 naapertorlugu iliussissatut pilersaarut suliarissavai naammassillugillu pisariaqarpallu taakku tunngavigalugit allaganngorlugu nutaamik aalajangiissalluni.
- 3) § 17 malillugu qulaajaaneq aamma § 47 malillugu iliussissatut pilersaarut suliaralugillu naammassissavai, aammalu taakku tunngavigalugu pisariaqarpat nutaamik aalajangiissalluni.

**§ 15.** Kommunalbestyrelse inunnut innarluutilinnut navianartumiittut nalilerneqartunut immikkorluinnaq ittumik immikkullu iliuuseqassaaq.

*Imm. 2.* Nalilersuineq aamma imm. 1 naapertorlugu suliniutit allartinneqartut suliamik ingerlatsineq tamanillu isiginnilluni nalilersuineq aallaavigalugit pissapput.

#### *Qulaajaaneq*

**§ 16.** Kommunalbestyrelse inuup innarluutillip atugaanik innuk kapitali 10-mi aalajangersakkat malillugit taperserneqarnissamik pisariaqartitsisutut ilimagineqarneqarpat imaluunniit kapitalit 4-mit 6-mut aalajangersakkat malillugit ineqarnermut neqeroorummi najugaqarnissaanik qulaajaassaaq. Kisiannili qulaajaanissaq pisariaqanngitsoq ersarippat qulaajaasoqanngilaq.

*Imm. 2.* Qulaajaaneq sapinngisamik uku akimut suleqatigalugit ingerlanneqassaaq:

- 1) inuk innarluutilik,
- 2) inummut akisussaatisoqarpat tassunga akisussaataasoq,
- 3) Inuk meeraappat tassunga angajoqqaatut oqartussaassusilik, , kiisalu
- 4) isumassuisut allat,
- 5) peqqinnissaqarfik
- 6) pisortani oqartussat suliamut attuumassuteqartut
- 7) paaqqinnittarfiit inuk innarluutilik pillugu ilisimasaqartut.

*Imm. 3.* Qulaajaaneq, pissutsit taamaaliortitsippata, qajassuartumik ingerlanneqassaaq siunertamilu anguniarneqartunit annertunerussanani.

*Imm. 4.* Kommunalbestyrelse qulaajaangermut atatillugu ukuninnga nalilersuissaaq:

- 1) Ataavartumik timikkut, tarnikkut, silassorissutsikkut imaluunniit malugisaqarsinnaanikkut pisinnaanikinnerulersimanagerup annertussusia.
- 2) Imminut isumassorsinnaaneq.
- 3) Iliuuseqartarneq, atugarissaarneq ineriartornerlu.
- 4) Attaveqartarneq.
- 5) Ilaqutariinni pissutsit.
- 6) Inuttut atukkani pissutsit inunillu attaveqartarneq.
- 7) Peqqissutsimi pissutsi.
- 8) Ilinniagaqarneq, suliffeqarneq suliffissaqarnermullu periarfissat.
- 9) Inuiaqatigiinni peqataaneq tamassumanilu pisinnaasat.
- 10) Inatsisartut inatsisaat una malillugu imaluunniit inatsisit allat malillugit inummut tapersersuineq.

**§ 17.** Kommunalbestyrelsi qulaajaaneq tunngavigalugu tapersiinissap aallartinneqarnissaanut tunngavissaqarnersoq allaganngorlugu aalajangiissaaq.

*Imm. 2.* Qulaajaaneq inuk innarluuteqartoq tapersersorneqarnissamik pisariaqartitsisoq kommunalbestyrelsimit paasineqarnerata kingorna kingusinnerpaamik qaammatit marluk

qaangiunneranni naammassineqassaaq. Inuk innarluuteqartoq tapersersorneqassappat atortunilluunniit ikiuutiniq tunineqassappat qulaajaanerp naammassinerat atatillugu allaganngorlugu aalajangiisoqassaaq allaganngorlugulu iliuusissatut pilersaarusiortoqassalluni..

*Imm. 3.* Kommunalbestyrelse qulaajaaneq naammassineqarsinnaasimangippat imaluunniit imm. 2-mi piffissaliussap aalajangerneqartup iluani iliuusissatut pilersaarusiortoqangippat utaqqiisaasumik nalilersuissaaq, inullu innarluutilik tamanna pillugu ulloq qulaajaanerp iliuusissatulluunniit pilersaarutip naammassineqarfissaattut ilimagineqartoq allaganngorlugu ilisimatinneqassalluni.

**§ 18.** Tapersiineq pillugu kommunalbestyrelse utaqqiisaasumik aalajangiippat kommunalbestyrelse qulaajaanerp naammassineqarneranut atatillugu tapersiineq utaqqiisaasumik aalajangiineq tunngavigalugu aallartinneqartoq ingerlateqqinneqassanersoq atorunnaarsinneqassanerluunniit isummissaaq. Tassunga atatillugu inuk angajoqqaatullu oqartussaassuseqartoq immaqalu inummik nakkutiginnittoq tapersersuineq qanoq isummerfigineraat mianerineqassaaq.

*Imm. 2.* Kommunalbestyrelsep suliani immikkut pisariusuni § 17, imm. 1 malillugu qulaajaanissap ingerlannissaanik pillugu Pissassarfimmu qinnuiginnissinnaavoq.

*Misissorneqarnissamut katsorsarneqarnissamullu peqqinnissaqarfimmu innersuussineq*

**§ 19.** Kommunalbestyrelse angajoqqaatut oqartussaassuseqartup imaluunniit nakkutilliisup nappaammut qaangerneqarsinnaangitsumut nappaammulluunniit meeraq, inuusuttoq imaluunniit inuk inatsisitigut pisussaaffeqanngitsoq misissortissimangippassuk aammalu inuk pisinnaasakkut malunnartumik ataavartumillu sunnersimappassuk, meeraq, inuusuttoq imaluunniit inuk innarluutilik inatsisitigut pisussaaffeqanngitsoq misissortinnissaanut katsorsartinnissaanulluunniit pisariaqartitsinersoq nalililersorniarlugu peqqinnissaqarfimmu innersuunneqassanersoq angajoqqaatut oqartussaassusillip imaluunniit nakkutilliisup akuersineratigut allaganngorlugu aalajangiisinnaavoq.

*Imm.. 2.* Misissortinnissap katsorsartinnissalluunniit pinngitsoortinnerisigut inuup tarnikkut timikkullu pissutsimikkut ataavartumik piginnaasakinnerulernissaanut ersarissumik aarlerinartoqarpat, meeraq, inuusuttoq imaluunniit inuk innarluutilik inatsisitigut pisussaaffeqanngitsoq misissortinnissaanut katsorsartinnissaanulluunniit pisariaqartitsinersoq nalililersorniarlugu peqqinnissaqarfimmu innersuunneqassanersoq angajoqqaatut oqartussaassusillip imaluunniit nakkutilliisup akuersiteqqaanngikkaluarlugit kommunalbestyrelse aalajangiisinnaavoq.

*Inissiviugallartoq*



§ 20. Inummut innarluutilimmut qitiusumik innersuussisarfik aqutigalugu ulloq unnuarlu neqeroorummi inissamik utaqqisumut inissiiviugallartussamik pissarsinissamik kommunalbestyrelse pisussaaffeqarpoq.

#### Kapitali 4

##### *Kommunini najugaqarfissatut neqeroorutit*

##### *Najugaqaqatigiiffik*

§ 21. Kommunalbestyrelse inunnt innarluutilinnut najugaqaqatigiiffissamik pilersitsisinnaavoq, ingerlatsisinnaavoq atorunnaarsitsisinnaallunilu. Najugaqaqatigiiffik najugaqartunut ulluunerani tapersersuinissamik neqerooruteqassaaq.

*Imm. 2.* Naalackersuisut najugaqaqatigiiffinnik pilersitsinissamik kommunalbestyrelse, imatut pisoqartillugu peqqusinnaavaat:

- 1) inuit marluk amerlanerusulluunniit 18-it sinnerlugit ukiullit inissiamik najugaqatigiiffimmiittumik pissarsinissaminnut pisinnaatitaaffeqarpata, kommunimi najugaqarpata, aamma
- 2) pineqartut taakkua ataatsimoorlutik najugaqatigiissinnaappata.

*Imm. 3.* Naalackersuisut najugaqaqatigiiffiit pillugit malittarisassanik sukumiinerusunik aalajangersaassapput.

§ 22. Kommunalbestyrelse Inummut innarluutilimmut nunaqqataasunut qanittumiittumi najugaqaqatigiiffimmi najugaqarnissamik ima pisoqartillugu neqerooruteqassaaq,:

- 1) inuk 18-inik ukioqarpat utoqqaaneruppalluunniit,
- 2) inuup pingaarutilimmik timikkut, tarnikkut, silassorissutsikkut imaluunniit malugisaqarsinnaanikkut piginnaanikinnerulersimanini pissutigalugu ulluinnarni tapersersorneqarnissaq pisariaqartippagu,
- 3) inuk annertuumik timikkut tarnikkut, silassorissutsikkut imaluunniit malugisaqarsinnaanikkut piginnaanikinnerulersimanini pissutigalugu nammineq angerlarsimaffimmini najugaqarsinnaanngippat,
- 4) inuk nammineersinnaappat, perorsaanikkut suliassatigullu ikiorneqarnissaq taamaallaat ulluunerani nalunaquttap akunnerini pisariaqarluni, aamma
- 5) inuup pisariaqartitai najugaqaqatigiiffimmi najugaqarnerani naammassineqarsinnaappata.

*Imm. 2.* Imm. 1 malillugu inuup tapersersorneqarnissamik pisariaqartitsinera nunaqqataasunut qanittumi najugaqaqatigiiffimmiinnermi naammassineqarsinnaanngippat, inuk innarluutilik najugaqaqatigiiffimmi, kommunimi allami inissisimasumi najugaqarnissamik kommunalbestyrelsip neqeroorfigisinnaavaa. Imm. 1, nr. 1-5-imi piunasaqaatit naammassineqarsimassapput.

*Imm. 3.* Imm. 2 malillugu najugaqaqatigiiffimmi kommunimi allami inissisimasumi inuup inissamik neqeroorfigineqarnissaanut piunasaqaataapput:

- 1) inuk imaluunniit taassuma angajoqqaatut oqartussaasua akuersisimassapput, aamma
- 2) inissap neqeroorutigineqarnissaa sioqqullugu, inuup kommunimi angerlarsimaffiani kommunalbestyrelsip aamma kommunimi najugaqatigiiffiup aalajangersimasup inissisimaffigisaani kommunalbestyrelsip akornanni isumaqatigiissuteqartoqarsimassaaq.

*Najugaqarfii illersugaasut*

**§ 23.** Kommunalbestyrelse inunnut innarluutilinnut najugaqarfinnik illersugaasunik pilersitsissaaq, ingerlatsissaaq matusillunilu. Najugaqarfik illersugaasooq najugaqartunut ulloq unnuarlu tamaat tapersersuinissamik neqerooruteqassaaq.

*Imm. 2.* Nalaakkersuisut kommunalbestyrelse § 25 naapertorlugu najugaqarfimmi illersugaasumi ineqarnissamat pisinnaatitaasunut inunnut marlunnut arlalinnuunniit, 18-it qaangerlugit ukiulinnut utoqqaanerusunulluunniit kommune angerlarsimaffittut kommunerineqarpat, najugaqarfimmik illersugaasumik pilersitseqqullugu peqqusinnaavaat.

*Imm. 3.* Naalakkersuisut najugaqarfii illersugaasut pillugit maleruagassanik sukumiinerusunik aalajangersaassapput.

**§ 24.** Kommunalbestyrelse inummut innarluutilimmut nunaqqataasunut qanittumiittumi najugaqarfimmi illersugaasumi najugaqarnissamik imatut pisoqartillugu neqerooruteqassaaq:

- 1) inuk 18-it qaangerlugit ukioqarpat utoqqaaneruppalluunniit,
- 2) inuk annertuumik timikkut tarnikkut, silassorissutsikkut imaluunniit malugisaqarsinnaanikkut piginnaanikinnerulersimanini pissutigalugu ulluinnarni tapersersorneqarnissaaq pisariaqartippagu,
- 3) inuk annertuumik timikkut tarnikkut, silassorissutsikkut imaluunniit malugisaqarsinnaanikkut piginnaanikinnerulersimanini pissutigalugu nammineq angerlarsimaffimmini najugaqarsinnaanngippat,
- 4) inuk najugaqatigiiffimmi neqeroorutigineqarsinnaasut saniatigut, tapersersorneqarnissamik pisariaqartitsippat, ilanngullugu ulloq unnuarlu tamaat tapersersorneqarnissamik pisariaqartitsippat, aamma
- 5) inuup pisariaqartitai najugaqarfimmi illersugaasumi najugaqarnermi naammassineqarsinnaappata.

*Imm. 2.* Kommunalbestyrelsep inuup innarluutillip nunaqqataasunut qanittumi imm. 1 malillugu najugaqarfimmik illersugaasumik tapersersorneqarnissamik pisariaqartitsinera naammassineqarsinnaanngippat inuup innarluutillip kommunimi allami najugaqarfimmi illersugaasumi najugaqarnissaa neqeroorutigisinnaavaa,. Imm. 1-imi nr. 1-5-imut piunasaqaatit suli naammassineqarsimassapput.

*Imm. 3.* Inuup imm. 2 malillugu kommunimi allami najugaqarfimmi illersugaasumi inissinneqarnissaanut neqeroorfigineqarnissaanut uku piunasaqaataapput:

- 1) inuk tassungaluunniit akisussaataasinnaasoq akuersisapput, aamma

2) inuup kommunimi angerlarsimaffiani kommunalbestyrelsip, kommunimilu najugaqarfiup illersugaasup aaslajangerrsimasup inissisimaffigisaani kommunalbestyrelsip akornanni inissap neqeroorutigineqannginnerani isumaqatigiissusiussapput.

*Najugaqatigiiffinnut najugaqarfimnullu illersugaasunut aalajangersakkat allat*

**§ 25.** Kommunalbestyrelse inuk kommunimi allami inissisimasumi najugaqatigiiffimmiinnissamik imaluunniit najugaqarfimmi illersugaasumiinnissamik neqerooruteqartoqassasoq allaganngorlugu aalajangiippat, kommunalbestyrelsip inuup najugaqatigiiffimmiinneranut imaluunniit najugaqarfimmi illersugaasumiinneranut aningaasartuutit akilissavai.

*Imm. 2.* Kommunalbestyrelse imm. 1 naapertorlugu kommunip avataani najugaqatigiiffimmiinnissaq imaluunniit najugaqarfimmi illersugaasumiinnissaq neqerooruteqarpat, najugarisap nuunneqarnerani aningaasartuutitut matussutissanik aningaasaqarnikkut tapersiinnissamik neqerooruteqassaaq.

**§ 26.** Kommunalbestyrelse ataatsimiititaliamik kommunimi najugaqatigiiffinnit aamma najugaqarfinnit illersugaasunit tamanit ilaanniilluunniit sinniisuuffigineqartumik aamma allanit najugaqatigiiffinni najugaqarfimnilu illersugaasuni najugaqartut pillugit tamanik isiginnilluni iliutsinik ataqatigiissaarinermi akuutinneqarnissannik naleqquttutut isigineqartunit sinniisuuffigineqartumik pilersitsisinnaavoq.

*Imm. 2.* Oqartussat peqataasut suliani aalajangersimasuni suleqatigiinnerup ilaatut suliap suliarineqarneranut pingaaruteqarpata, inuk pillugu paasissutissat paarlaasseqatigiissutigisinnaavaat, tassunga ilanngullugit paasissutissat inummut tunngasut mianerisariaqartut. Oqaaseqatigiit siulliit malillugit paasissutissat aatsaat inuk suliami pineqartoq, angajoqqaatut oqartussaassuseqartoq taassumaluunniit nakkutilliisorisinnaasaa akuersippata paarlaasseqatigiissutigineqarsinnaapput, taamaattoq takujuk imm. 3.

*Imm. 3.* Inuk pillugu paasissutissat imm. 2 malillugu akuersisoqarusunngippat, imaluunniit allanik pissuteqartumik akuersititsinissaq ajornarpat, suliami pissutsit, tassunga ilanngullugu inuup inatsisitigit illersugaanera pissutissaqartitsippata paarlaasseqatigiissutigineqarsinnaapput.

## **Kapitali 5**

### *Ulloq unnuarlu neqeroorutit*

**§ 27.** Naalakkersuisut inunnut innarluutilinnut ulloq unnuarlu neqeroorummik pilersitsisinnaapput, ingerlatsisinnaapput matusisinnaallutillu, matumani ulloq unnuarlu neqeroorutit matoqqasut ilanngullugit.

*Imm. 2.* Ulloq unnuarlu neqeroorut matoqqasoq tassaavoq ulloq unnuarlu neqeroorut, imaluunniit ulloq unnuarlu neqeroorummi immikkoortorta, matut silarliit igalaallu parnaaqaannartarnissaat akuerisaasoq.

*Imm. 3.* Naalackersuisut ulloq unnuarlu neqeroorutit pillugit maleruagassanik sukumiinerusunik aalajangersaassapput.

**§ 28.** Naalackersuisut inunnut innarluutilinnut ulloq unnuarlu neqeroorutini najugaqartunut, illersugaasumik suliffeqartitsinissamik, sammisaqartitsinissamik katerisimaagateqartitsisarnissanillu neqerooruteqartassapput.

**§ 29.** Kommunalbestyrelse inuk annertuumik timikkut tarnikkulluunniit piginnaanikinnerulersimanini pissutigalugu ulluinnarni annertuumik imaluunniit immikkuullarissumik tapersorneqarnissamik pisariaqartitsippat imaluunniit paaqqtarineqarnissamik, isumassorneqarnissamik katsorsarneqarnissamilluunniit pisariaqartitsippat, pisariaqartinneqartullu taakku allatigut naammassineqarsinnaanngippata inummut innarluutilimmut, ulloq unnuarlu neqeroorummiinnissamut neqerooruteqassaaq.

*Inunnik innarluutilinnik ulloq unnuarlu neqeroorummut isumannaakkamut inissiisarneq*

**§ 30.** Inummik innarluutilimmik Kalaallit Nunaanni imaluunniit Danmarkimi ulloq unnuarlu neqeroorummi isumannaallisakkami imatut pisoqarpat inissiisoqarsinnaavoq,:

- 1) Inummik innarluutilimmik angerlarsimaffimmi imaluunniit paaqqinniffimmi tulluurtumi tigusarinninnerup atuutiinnarnissaa pillugu Kalaallit Nunaanni eqqartuussisarnermik inatsimmi § 358, aamma § 361, imm. 2, nr. 3 naapertorlugit eqqartuussivik aalajangiippat.
- 2) Kalaallit Nunaanni eqqartuussisarnermik inatsimmi § 359, aamma § 361, imm. 2, nr. 3 naapertorlugit inuup innarluutillip angerlarsimaffimmi imaluunniit paaqqinniffimmi tulluurtumi tiggummigallarneqarnissaa pillugu eqqartuussivik aalajangiisimappat.
- 3) Kalaallit Nunaannut Pinerluttulerinermut inatsimmi kapitali 32 imaluunniit 33 malillugit pineqaatissiinissaq pillugu eqqartuussivik aalajangiippat.

*Imm. 2.* Kommunimi inuup innarluutillip tigusarineqarnermini aamma tiggummigallarneqarnerani najugaqarfigisaani kommunalbestyrelse, pisuni imm 1, nr 1-imi pineqartunut ilaasuni, sapinngisamik piaarnerpaamik, politiinit isumannaallisaanikkut isumannaatsutut nalilerneqartumik, angerlarsimaffiup avataani inissiiffissamik pissarsissaaq.

*Imm. 3.* Inuup innarluutillip tiggummineqarallarnermi nalaani kommunimi najugaqarfigisaani, pisuni imm 1, nr 2-mi ilaasuni, piaarnerpaamik, taamaattoq kingusinnerpaamik nalunaaquttap akunnerisa 72-it iluanni, politiinit isumannaallisaanikkut isumannaatsutut nalilerneqartumik, angerlarsimaffiup avataani inissiiffissamik kommunalbestyrelse pissarsissaaq.

*Imm. 4.* Naalakkersuisut Kalallit Nunaannut pinerluttulerinermut inatsimmi § 240 naapertorlugu kikkut eqqartuussisussaansut pillugit maleruagassanik sukumiinerusunik aalajangersaassapput.

§ 31. Pinerluttunik Isumaginnittoqarfimmi aqutsisut Kalaallit Nunaannut pinerluttulerinermut inatsimmi § 234 naapertorlugu angerlarsimaffimmi imaluunniit paaqqinniffimmi naleqquttumi inissiinissamik aalajangiippata, inuit innarluutillit ulloq unnuarlu neqeroorummi isumannaallisakkami inissinneqarsinnaapput.

*Kinguaassiuutitigut atornerluisarnermik pinaveersaartitsineq*

§ 32. Ulloq unnuarlu neqeroorummi sulisut inunnik innarluutilinnik kinguaassiuutitigut atornerluisarnerup pinaveersaartinneqarneranik suliaqarnermi makku immukkut eqqumaffigissavaat:

- 1) Pinaveersaartitsineramik suliaqarnermut ataatsimut naleqartitanik tunngaveqarnissaq.
- 2) Pasitsaassaqarnermi pinaveersaartitsinermut iliuseqarnissamullu suleriaatsit.
- 3) Kinguaassiuutitigut atornerluisarnermut aarlerinaataasinnaasut pillugit ataatsimut ilisimasaqarneq.
- 4) Inuup innarluutillip atugarliorneranut ersiutit, taakkunani pissusilersornikkut timikkullu sunniutit ilanngullugit.
- 5) Kinguaassiuutitigut atornerlunneqarnermut timikkut ersiutit.

*Ineriartortitsinissamut pilersaarut*

§ 33 Ulloq unnuarlu neqeroorut ulloq unnuarlu neqeroorummi najugaqarnerup aallartinnerata kingorna kingusinnerpaamik qaammatit pingasunut qaangiunneranni minnerpaamillu ukiumut ataasiarluni § 47 naapertorlugu iliuusissatut pilersaarut aallaavigalugu inunnut innarluutilinnut ineriartortitsineranut pilersaarusiussaaq.

*Imm. 2.* Imm. 1 naapertorlugu ineriartortitsineranut pilersaarummi ulloq unnuarlu neqeroorummi najugaqarnermi siunertaq anguniakkallu aallaavigalugit perorsaaneramik suliaqarneq iliuusissatut anguniakkap anguneqarnissaanut qulakkeerinnittussaq allaaserineqassaaq.

*Killiffik pillugu nalunaarusiat*

§ 34. Ulloq unnuarlu neqeroorutip kommunalbestyrelsep § 83 naapertorlugu inunnik nakkutilliineranut atugassamik § 47 naapertorlugu iliuusissatut pilersaarummut aamma § 33 naapertorlugu ineriartortitsinissamut pilersaarummut tunngatillugu inuup innarluutillip atugarissaarnera ineriartorneralu pillugit killiffik pillugu nalunaarusiakkt kommunalbestyrelse ilisimatissavaa.

*Imm. 2.* Killiffik pillugu nalunaarusiat ulloq unnuarlu neqeroorummiinnerup aallartinnerata kingorna kingusinnerpaamik qaammatit pingasut qaangiunneranni kommunalbestyrelsinit nassiunneqartassapput. Tamatuma kingorna killiffik pillugu nalunaarusiat imatut nassiunneqartassallutik:

- 1) inuit innarluutillit 18-it inorlugit ukiullit, pillugit ukioq affakkuutaarlugu ataasiarluni, aamma
- 2) inuit innarluutillit, 18-inik ukiullit utoqqaanerusunullu pillugit ukiumut ataasiarluni.

*Imm. 3.* Ulloq unnuarlu neqeroorut imm. 2 malillugu killiffik pillugu nalunaarusianik nassiussisarnerup saniatigut, inuup peqqissusini pissutsit inuttullu atukkatigut pissutsit annertuumik allangorpata kommunalbestyrelsimut ilisimatitsissaaq.

## **Kapitali 6**

### *Kalaallit Nunaata avataani najugaqarfissatut neqeroorutit*

**§ 35.** Kommunalbestyrelse inuup innarluutillip § 22 naapertorlugu najugaqaqatigiiffimmi, § 24 naapertorlugu najugaqarfimmi illersugaasumi imaluunniit § 29 naapertorlugu ulloq unnuarlu neqeroorummi ineqarnissamik neqeroorfigineqartup Kalaallit Nunaanni najugaqarfissatut neqeroorummi inissinneqarnissaanik qulakkeerinnissaaq, taamaattoq takujuk imm. 2.

*Imm. 2.* Inuup pisariaqartitai Kalaallit Nunaanni naammassineqarsinnaanngippata Kalaallillu Nunaanni naleqquttumik tapersersuinissamut periarfissat tamarmik nungussimappata Naalakkersuisut siusissukkut akuersinerat tunngavigalugu Kalaallit Nunaata avataani najugaqarfissatut neqeroorummi piffissami killilimmi najugaqarnissaq neqeroorutigineqassaaq.

*Imm. 3.* Naalakkersuisunut inassuteqaat makkuninnga imaqassaaq:

- 1) Suliamik saqqummiineq.
- 2) Iliuusissatut pilersaarut.
- 3) Akuersinermik nalunaarut.
- 4) Kommunalbestyrelsimiit akuersinermut allagaq aalajangiinermillu allagaq.
- 5) Oqaaseqaatit nalunaarusiallu suliamut attuumassuteqartut.
- 6) Piginnaasanik immersuiffik qulaajaanerluunniit.
- 7) Danmarkimi oqartussanit suliamut attuumassuteqartunit tigusaqarnermik allagaq imaluunniit najugaqartitsisinaanermik allagaq.
- 8) Nakorsap imaluunniit tarnip pissusaanik ilisimasallip misissuinerat. Misissuineq piffissami inuup Kalaallit Nunaata avataani inissinneqarnissaanik inassuteqaateqarnermit sivisunerpaamik ukiunik pingasunik pisoqaassaaq.
- 9) Inuup pilersorneqarnerani tunngavimmik allaaserinninneq.

*Imm. 4.* Naalakkersuisut Kalaallit Nunaata avataani najugaqarfissatut neqeroorummi najugaqarneq pillugu malittarisassanik sukumiinerusunik aalajangersaasinnaapput.

**§ 36.** Kommunalbestyrelse Kalaallit Nunaanni najugaqarfissatut neqeroorummik naleqquttumik nassaarpat imaluunniit utaqqiisaasumik najugaqarneq taamaatippat, inuk innarluutilik Kalaallit Nunaanni najugaqarfissatut neqeroorummut tassunga aallassaaq. Innuttaasup neqeroorut akueringgippagu inuk innarluutilik Kalaallit Nunaanni kommunimut angerlarsimaffimmut aallassaaq.

**§ 37.** Kommunalbestyrelsep inuk innarluutilik Kalaallit Nunaanni ingerlanneqarsinnaanngitsumik innarluummot tunngatillugu piginnaangorsarnissamik pisariaqartitsippat imaluunniit piginnaangorsaqqinnissamik suliniuteqarfigineqarnissamik pisariaqartitsippat, , inuup innarluutillip Kalaallit Nunaata avataani ulloq unnuarlu neqeroorummi piffissami killilikkami najugaqarnissaanik neqeroorfigisinnaavaa. Kalaallit Nunaata avataani ineqarnissamut neqeroorummi najugaqarnissaq pillugu neqerooruteqarnermi Naalackersuisut siumut akuersinissaat piumasqaataavoq.

*Imm. 2.* Inuk Kalaallit Nunaanni ingerlanneqarsinnaanngitsumik innarluumminut imaluunniit piginnaangorsaqqinnissamik pisariaqartitsinermut tunngatillugu piginnaangorsaqqinnissamik pisariaqartitsippat Kalaallit Nunaata avataani efterskolemi neqeroorummiluunniit tassunga assingusumi ulloq unnuarlu neqeroorummi piffissami killilikkami najugaqarnissamut neqeroorut inatsisinut allanut tunngatillugu tapiliussaavoq.

**§ 38.** Kommunalbestyrelsip inuk innarluumminut imaluunniit piginnaangorsaqqinnissamik suliniuteqarnissamik Kalaallit Nunaanni ingerlanneqarsinnaanngitsumik pisariaqartitsinermut atatillugu ilinniarfimmot atasumik najugaqarfimmi inuk innarluutilik piffissami killilimmi najugaqarnissamik neqeroorfigisinnaavaa.

*Imm. 2.* Imm. najugaqarfik inissiaq tassaasinnaavoq inissiaq, klubværelsi, ilinniartut inaat najugaqarfilluunniit alla inummot innarluuteqartumut naleqquttoq

**§ 39.** Kalaallit Nunaata avataani najugaqarfissatut neqeroorummi najugaqarnissamut neqeroornermi Naalackersuisut siumut akuersinissaat piumasqaataavoq.

*Imm. 2.* Naalackersuisunut imm. 1 imaluunniit 2 malillugu inassuteqaat makkuninnga imaqassaaq:

- 1) Suliamik saqqummiineq.
- 2) Iliuusissatut pilersaarut.
- 3) Akuersinermik nalunaarut.
- 4) Kommunalbestyrelsimiit akuersinermik allagaq aalajangiinermillu allagaq.
- 5) Oqaaseqaatit nalunaarussiallu suliamut tunngasut.
- 6) Piginnaasanik immersugassaq qulaajaanerluunniit.
- 7) Danarmkimit tigusineq pillugu allagaq najugaqartitsinissamillu allagaq.
- 8) Nakorsap imaluunniit tarnip pissusaanik ilisimasallip misissuinerat. Misissuineq inuup Kalaallit Nunaata avataanut inissinneqarnissaanik inassuteqaateqarnermit ukiut kingumut pingasut qaangiuttut ullulernerqarsimassaaq.

9) Inummik pilersuinermi tunngavimmik allaaserinnineq.

*Imm. 3.* Kalaallit Nunaata avataani inissinneqarallarnissaq pillugu malittarisassanik erseqqinnerusunik Naalakkersuisut aalajangersaasinnaapput, matumani inissinneqarallarnerup sivilissusissaa ilanngullugu.

**§ 40.** Kommunalbestyrelsep Kalaallit Nunaata avataanut inissiinermi najugaqartitsilerner miluunniit § 35 naapertorlugu tapersersuinerup aamma § 37 naapertorlugu piginnaangorsarnerup ataatsimoortinnissaannik pisariaqartitsineq eqqumaffigissavaa.

## **Kapitali 7**

### *Najugaqarfissatut neqeroorutip allanngornera unitsinneralu*

**§ 41.** Kommunalbestyrelse inuup piginnaasai allanngorpata innuttaasullu ikiorneqarnissamik pisariaqartitsinera annertunerulerpat annikinnerulerpalluunniit kapitalini 4-mit 6-imut aalajangersakkat malillugit inuup innarluutillip najugaqarfissatut neqeroorumi najugaqarnerata unitsinneqarnissaa pillugu imaluunniit najugaqarfissatut neqeroorummot allamut nuunnissaa pillugu allaganngorlugu aalajangiissaaq.

*Imm 2.* Kommuinalbestyrelsep najugaqarfissatut neqeroorumi najugaqarnerup unitsinneqarnissaanik imaluunniit najugaqarfissatut neqeroorummot allamut nuussinissamik aalajangiisoqartinnagu uku qulakkiissavai:

- 1) inuup najugaqarfissatut neqeroorummot angerlartinneqareernerata imaluunniit najugaqarfissatut neqeroorummot allamut nuunneqarnerata kingorna inuk pisariaqartumik tapersersorneqassasoq,
- 2) inuup najugaqarfissatut neqeroorummot angerlartinneqareernerata imaluunniit najugaqarfissatut neqeroorummot allamut nuutsinneqarnerata kingorna inuup tapersersuisoqarneranut iliuusissatut pilersaarummik suliaqartoqarsimassasoq,
- 3) inummik tassungalu angajoqqaatut oqartussaaseqarsinnaasunik imaluunniit nakkutilliisuusinnaasumik oqaloqateqartoqarsimanissaa, aamma
- 4) najugaqarfissatut neqeroorut allaganngorlugu oqaaseqaateqartinneqassasoq, taannalu inuup innarluutillip najugaqarfissatut neqeroorumi najugaqarunnaarnissaanik aalajangiisimasinnaaneq pillugu oqaaseqaammik aamma inuup innarluutillip pingaarnertut atugarissaanerata killiffianik tapersorneqarnissamillu sulii pisariaqartitsisoqarnerasoq imaqaassaaq

*Imm. 3.* Kommunalbestyrelsep meeqqap innarluutillip kapitalimi 5-imi aalajangersakkat malillugit ulloq unnuarlu neqeroorumi najugaqarnerata unitsinneqarnera pillugu allaganngorlugu aalajangiinninnermi, imm. 2-mi piunasaqaatit saniatigut qulakkiissavai:

- 1) meeqqap ulloq unnuarlu neqeroorumi innerata unitsinneqarnerata siuninnguani kinguninnguani meeqqamut angajoqqaatut oqartussaassusilimmut, nakkutilliisuusinnaasumut aamma meeqqap attaveqarfigisinnaasaanut tapersersuisinnaaneq piareersarneqarsimassasoq, aamma



2) meeraq aamma angajoqqaatut oqartussaassusillit imaluunniit nakkutilliisuusinnaasoq qanitigisallu allat ulloq unnuarlu najugaqarnerup unitsinneqarnera pillugu piareersarluarsimassasut.

*Imm. 4.* Najugaqarfissatut neqeroorut imm. 2, nr. 4 naapertorlugu oqaaseqaateqarpat, tassanilu inuk najugaqarfissatut ineqarfimmi najugaqaannassoq inassuteqaatigineqarpat, Kommunalbestyrelsep Pissassarfik § 7, imm. 1, nr. 7 naapertorlugu oqaaseqaateqartissavaa. Kommunalbestyrelsep najugaqarfissatut neqeroorummi ineqarnerup unitsinneqarnissaa pillugu aalajangiinnginnermi Pissassarfiup oqaaseqaataata tigunissaa utaqqissavaa.

**§ 42.** § 41, imm. 1 malillugu najugaqarfissatut neqeroorummi najugaqarnermik unitsitsineq imaluunniit najugaqarfissatut neqeroorummut allammut nuutsitsineq imatut pisoqanngippat sivikinnerpaamik sapaatik akunneri aqqaneq marluk sioqqullugit nalunaarutigineqassaaq:

- 1) inuup innarluutillip imaluunniit taassuma nakkutilliisorisinnaasaata imaluunniit angajoqqaatut oqartussaassusillit inissiinerup unitsinneqarnissaa erseqqissumik allaganngorlugulu akuerisimappassuk,
- 2) inummik innarluutilimmik mianerinninnissap siumut nalunaaruteqarnissamut piffissaliussap saneqqunneqarnissaa pisariaqartitippagu, imaluunniit
- 3) mianerisassat annertuut allat siumut nalunaaruteqarnissamut piffissaliussap saneqqunneqarnissaa pisariaqartitsisippasigit. Aningaasaqarnermi mianerisassat piffissaliussap saneqqunneqarnissaanut tunngavigineqarsinnaanngillat.

**§ 43.** § 41, imm. 2, nr. 1-3-mi kiisalu § 41, imm. 3-mi aamma § 42, imm. 1-imi aalajangersakkat, inuup innarluutillip Kalaallit Nunaata avataani najugaqarfissatut neqeroorummi najugaqarnerisa unitsinneqarnissaa imaluunniit Kalaallit Nunaanni namminermi avataanilu najugaqarfissatut neqeroorummut nuutinneqarnissaa pillugit kommunalbestyrelsip allaganngorlugu aalajangiinerinut taamatuttaaq atuupput, taamaattorli takujuk § 36. Inuup innarluutillip kommunimi angerlarsimaffigisaani kommunalbestyrelse inissiisimanerup unitsinneqarnissaa imaluunniit najugaqarfissatut neqeroorummut allamut nuunneqarnissaa pillugu allaganngorlugu aalajangiisoqannginnerani, aamma Kalaallit Nunaata avataani kommunimit najugaqarfigisamit allaganngorlugu nassuiaateqartitsissaaq, taamaattorli takujuk.

## **Kapitali 8**

*Suliassat nalinginnaasumik suliarineqartarnerat*

*Sulianik suliarinninnermi piffissaq atorineqartartoq*

**§ 44.** Kommunalbestyrelsep aalajangiinissaq siunertaralugu Inatsisartut inatsisaat una malillugu taperserineqarnissaaq pillugu, taamaattoqarpallu suut tapersiissutaassanersut pillugit apeqqutit pisariaqanngitsumik uninngatitsinani suliarissavai.

*Imm. 2.* Taperserneqarnissaq pillugu qinnuteqaatip tiguneqarneranit, aalajangiinerup pereersimanissaanut piffissaq qanoq sivisutigissanersoq, piffissamut killiliussanik kommunalbestyrelse aalajangersaassaaq. Inatsisartut inatsisaanni matumani piffissaliussamut aalajangersaasoqarsimappat tamanna atuutissanngilaq. Piffissamut killissaliussat annerpaamik ukiut marlukkaarlugit nalilersorneqartassapput kommunillu nittartagaatigut tamanut saqummiunneqassallutik.

*Imm. 3.* Imm. 2 naapertorlugu piffissaliussaq suliami aalajangersimasumi malinneqarsinnaanngippat, inuk innarluutilik imaluunniit taassumunnga nakkutilliisoq imaluunniit angajoqqaatut oqartussaassusillit, piffissaliussap naannginnerani aalajangiineq qaqugu pisinnaanersoq pillugu allaganngorlugu nalunaarfigineqassapput, tassani aamma ilaassalluni soq piffissaliussaq eqqortinneqarsinnaasimannginnersoq.

### *Ingerlaavartumik malitseqartitsineq*

**§ 45.** Kommunalbestyrelsimit tapersiinissaq imaluunniit najugaqarfissatut neqeroorummi najugaqarnissaq pillugu aalajangiisoqareerpat, tapersersuinermi siunertaasoq naammassineqarsinnaanersoq ingerlaavartumik malinnaaffigissavaa. Inuk innarluutilik sapinngisamik suleqatigalugu malitseqartitsisoqassaaq.

*Imm. 2.* Ingerlaavartumik malitseqartitsineq pillugu maleruagassanik erseqqinnerusunik Naalakkersuisut aalajangersaasinnaapput.

### *Oqaloqateqarneq*

**§ 46.** §§ 22, 24 imaluunniit 29 malillugit allaganngorlugu aalajangiisoqannginnerani kommunalbestyrelsip inuk innarluutilik minnerpaamik ataasiarluni oqaloqatigissavaa, taamaattoq takuuk § 41, imm. 2 aamma § 75, imm. 2.

*Imm. 2.* Imm. 1 malillugu kommunalbestyrelsip oqaloqatiginninnermini inuup innarluuteqarnera mianerissavaa aammalu oqaloqatigiinneq inuup innarluutillip piumasai tunngavigalugit ingerlatissallugu.

*Imm. 3.* Inuk innarluutilik 18-it inorlugit ukioqarpat imaluunniit nammineersinnaajunnaarsitaasimappat imm. 1 malillugu oqaloqatigineqarnera, inuk innarluutilik, taassumalu angajoqqaatut oqartussaasui imaluunniit pisariaqarpat nakkutilliusua peqataatillugit ingerlanneqassaaq.

*Imm. 4.* Taamaattoq inummut innarluutilimmut mianerisassat tamanna pisariaqartippassuk, angajoqqaatut oqartussaassusillit imaluunniit nakkutilliisut akuersiteqqaarnagit imaluunniit najuutsinnagit oqaloqateqarneq ingerlanneqarsinnaavoq.

*Imm. 5.* Angajoqqaatut akisussaasut imaluunniit angajoqqaatut sinniisoq akuersiteqqaarnagit peqataatinnagilluunniit oqaloqateqarneq ingerlanneqassappat, taava § 12 malillugu illersuisumik toqqaasoqassaaq ilaasoqarlunilu.

*Imm. 6.* Inuup inerisimanera piginnaasaqarneralu imaluunniit suliap suussusaa eqqarsaatigalugit oqaloqateqarnerup ingerlanneqarnissaa aalajangiisuusumik naleqqutinngippat, imm. 1 malillugu oqaloqateqarneq ingerlanneqassanngitsoq kommunalbestyrelsip aalajangersinnaavaa. Oqaloqateqarneq ingerlanneqarsinnaanngippat, inuup innarluutillip aalajangiinissatut eqqarsaatigineqartumut isumaa allatut pissarsiariniarneqassaaq. Oqaloqateqarneq pisimannngippat tamanna inummut iliuusissatut pilersaarummi tamatumunnga tunngavilersuilluni erseqqissaasoqassaaq.

*Iliuusissatut pilersaarut*

**§ 47.** Inunntut innarluutilinnut kommunalbestyrelsit allaganngorlugu iliuusissatut pilersaarutiniq suliaqassapput ima pisoqartillugu:

- 1) § 16 malillugu qulaajaanermut atatillugu.
- 2) Kapitali 10 malillugu tapersersorneqarnissap imaluunniit kapitali 4-6 malillugit najugaqarfissatut neqeroorummi najugaqarnissap aallartinnissaa pillugu aalajangiisoqannginnerani.
- 3) § 75 malillugu tapersersuinerup allanngortinneqarnissaa imaluunniit unitsinneqarnissaa pillugit aalajangiisoqannginnerani.
- 4) Meeqqap innarluutillip, Inatsisartut inatsisaat manna malillugu tapersersorneqartup, meeqqat atuarfianni atualernissaa kingusinnerpaamik qaammatinik 6-inik sioqqullugu.
- 5) Meeqqap innarluutillip, Inatsisartut inatsisaat manna malillugu tapersersorneqartup, meeqqat atuarfianni atuarnerata naammassinissaa kingusinnerpaamik qaammatinik 12-inik sioqqullugu.
- 6) Meeqqap innarluutillip, Inatsisartut inatsisaat manna malillugu tapersersorneqartup, 18-inik ukioqalernissaanut kingusinnerpaamik qaammatinik 12-inik sioqqullugu.

**§ 48.** Iliuusissatut pilersaarut, § 47 malillugu, inummut innarluutilimmut tunngasuussaaq aammalu siunertami anguniarneqartunit annertunerusinnaanani.

*Imm. 2.* Iliuusissatut pilersaarummi tulliini taaneqartut allassimassapput:

- 1) Siunertaq aamma tapersersuinermi anguniagaq.
- 2) Anguniagaq imaluunniit anguniakkat anguneqarnissaannut tapersersuineq suna pisariaqarnerisooq.
- 3) Tapersersuinerup sivilissusissaatut naatsorsuutigineqartoq.
- 4) Tapersersuinermit malitseqartitsinissaaq, matumani malitseqartitsineq qaqugukkut pisassanersooq ilanngullugu.
- 5) Inatsisartut inatsisaat manna malillugu aamma inatsisit allat malillugit tapersersuinerit allat ataqtigiinnerat.
- 6) Ilaquttat attaveqarfiillu, najugaqariaaseq, ilinniartitaaneq, suliffeqarneq, inuttut ikiorteqarneq, katsorsartinneq aamma atortorissaarutit ikiuutaasut il.il. pillugit pissutsit immikkut ittut allat.

7) Iliuusissamut pilersaarummut innutaasup nammineq oqaaseqaatai.

*Imm. 3.* Iliuusissatut pilersaarut sapinngisamik inuk innarluutilik tassungalu nakkutilliisut angajoqqaatullu oqartussaassusillit aamma allat isumassuisui oqaloqatigalugit suleqatigalugillu suliarineqassaaq.

*Imm. 4.* Qulaajaanerup naammassineqarneranit qaammatip ataatsip ingerlanerani iliuusissatut pilersaarut saqqummiunneqarsimassaaq.

*Imm. 5.* Kapitali 4-5 malillugit najugaqarfissatut neqeroorummiinnermi iliuusissatut pilersaaruttip ilai attuumassuteqartut najugaqarfissatut neqeroorummut tunniunneqarnissaat kommunalbestyrelsip isumagissavaa.

*Imm. 6.* Iliuusissatut pilersaarut inummut innarluutilimmut tassungalu nakkutilliisumut imaluunniit angajoqqaatut oqartussaassusilimmut tunniunneqassaaq, aammalu kommunalbestyrelse tunniussinnermut atatillugu taassuma imarisai pillugit ilisimatitsissaaq.

*Imm. 7* Inuup innarluutillip iliuusissatut pilersaarut pillugu oqaaseqarsinnaassusia

*Suliani aalajangersimasuni paasissutissanik paarlaasseqatigiinneq*

**§ 49.** Najugaqarfissatut neqeroorutip, kommunalbestyrelsip, Naalakkersuisut, ilinniarfeqarfiiit peqqinnissaqarfiullu suliani ataasiakkaani suleqatigiinnermut ilaatillugu, paasissutissat suliap suliarineqarneranut pingaaruteqarpata, inummut paasissutissat politiinut ingerlateqqissinnaavai, matumani aamma paasissutissat inummut tunngasut mianernartut ilanngullugit, matumanilu paasissutissat suliap suliarinissaanut pingaaruteqarsimappata.

*Imm. 2.* Inuk suliami pineqartoq, imaluunniit taassuma angajoqqaatut sinniisua imaluunniit angajoqqaatut akisussaasui akuersiteqqaarlugu paasissutissanik ingerlatitseqqittoqarsinnaavoq, taamaattoq takuuk imm. 3.

*Imm. 3.* Imm. 1 malillugu akuersissut tunniunneqarumanngippat, imaluunniit allanik pissuteqartumik akuersissummik piniartoqarsinnaanngippat, kommunalbestyrelsip paasissutissat inummut tunngasut ingerlateqqissinnaavai, matumani aamma paasissutissat inunmut tunngasut mianerilluinnartariaqartut ilanngullugit, suliami pissutsit, matumani inuup inatsisitigut isumannaatsuunissaata eqqarsaatigineqarnera ilanngullugu, erseqqissumik pisariaqartippassuk. Ingerlatitseqqinnermut piumasqaataavoq inuup soqutigisaanik nakkutiginninnissaq, taamaaliornerullu isertuussiinnarnissamik peqquteqarnissamut soqutigisat ersarissumik qaangersimassagai, matumani inuup pineqartup, paasissutissat tunngaviata, mianerineqarnissaata eqqarsaatigineqarnissaa ilanngullugu.

**Kapitali 9**

*Nalunaartarneq*

*Nalinginnaasumik nalunaaruteqartussaataaneq*

**§ 50.** Inuup innarluutillip atugarissaarneranut, peqqissusaanut imaluunniit ineriartorneranut navianartorsiortitsisumik atugaqartinneqartoq innuttaasup paasiguniuk, innuttaasup kialluunniit kommunalbestyrelsimut nalunaaruteqarnissani pisussaaffigaa.

*Imm. 2.* Nalunaarutiginninneq tiguneqarpat kommunalbestyrelse sapaatip akunnera qaangiutsinnagu innuttaasumut allakkatigut ilisimatitsissaaq nalunaarutiginninneq tigusimallugu.

*Nalunaaruteqarnissamut pisussaaffik sakkortunerusoq*

**§ 51.** Isumaginnittoqarfinni, peqqinnissaqarfinni ilinniartoqarfinnilu sulisut, inuk innarluutilik tapersiivigineqarnissamik pisariaqartitsisoq, inuussutissarsiutigalugu sulinerminnut atatillugu sulisup paasiguniuk imaluunniit ilimaginissaanut pissutissaqaruni, ingerlaannaq kommunalbestyrelsimut nalunaaruteqarnissamik sukannernerusumik pisussaaffeqarput. Nalunaarutiginnittussaataaneq taanna, innuttaasunit tamanit qinerneqarlutik suliaqartunut imaluunniit inuiaqatigiinni sullissillutik suliaqartunut, atuuppoq.

*Imm. 2.* Nalunaarutiginninnerup tignerata kingorna sapaatip akunnera 1 qaangiutsinnagu kommunalbestyrelse nalunaarutiginninnerup tiguneqarsimanera pillugu sulisumut nalunaarutiginnittumut allakkatigut uppersaammik nassiussissaaq.

*Kommunit akunnerminni nalunaaruteqarnissamut pisussaaffiat*

**§ 52.** Kommunalborgestypelip kommune nuuffigineqartoq allakkatigut nalunaarfigissavaa:

- 1) § 60 malillugu inuk innarluutilik nammeneq angerlarsimaffimmini ulluinnarni ikiorneqarlunilu isumassorneqartoq, imaluunniit § 61 malillugu nammeneq angerlarsimaffimmini paarineqartoq kommunimut allamut nuuppat, aamma inuk innarluutilik Inatsisartut inatsisaat manna malillugu suli tapersiivigineqarnissamik pisariaqartitsisoq kommunalborgestypelise isumaqarpat,
- 2) kapitali 4-6, malillugit inuk innarluutilik najugaqarfissatut neqeroorummut inissinneqartoq, nammeneq piumassutsini malillugu kommunimut allamut nuuppat, aamma
- 3) inuk innarluutilik nammeneq piumasani malillugu kommuninut allamut nuuppat, aamma kapitali 8 malillugu tapersiissutinik pisariaqartunik inutaa pinngikkuni inuup atugarissaarnera navianartorsiortinneqassasoq nalilerneqarpat.

*Imm. 2.* Imm. 1 malillugu nalunaarutiginninnermut atatillugu kommunip qimanneqartup suliassami najoqqutassat attuumassuteqartut nassiutissavai, matumani paasissutissat attuumassuteqartut eqikkarneqarnerat, tapersiivigineqarnissamik pisariaqartitsinermik naliliinnermut kommunip qimanneqartup tunngavigisimasai, ilanngullugit.

*Imm. 3.* Kalaallit Nunaannit nuuttoqartillugu, kommunimut nunani allaniittumut imaluunniit oqartussamut taamaaqataanut allamut tunngatillugu imm. 1-2 taamaaqataanik atuupput.

*Nalunaaruteqarnermi kommunip iliuuseqarnissamut pisussaaffia*

**§ 53.** Kommunalbestyrelse §§ 50, 51 imaluunniit 52 naapertorlugit nalunaarummik tiguserup kingorna kingusinnerpaamik nalunaaquttap akunneri 24-t qaangiuppata inuup innarluuteqartup peqqissusia ineriartorneraluunniit navianartorsionersut aamma inummut innarluutilimmut pinartumik suliniutit aallartinneqassanersut nalilersussavai

*Imm. 2.* Kommunalbestyrelse naliliippat inummut innarluuteqartumut piaartumik suliniutinik aallartitsisoqassanngitsoq, kommunalbestyrelse piaartumik kingusinnerpaamilli ullut suliffiit tallimat iluanni § 16 naapertorlugu qulaajaanermik aallartitsinissamut tunngavissaqarnersoq aalajangiissaaq.

*Imm. 3.* Imm. 1 malillugu qulaajaaneq aallartinneqassasoq kommunalbestyrelse aalajangiippat, qulaajaaneq piaartumik aammalu kingusinnerpaamik nalunaarutiginninnerup tiguneqarnerata kingorna sapaatit akunneri marluk qaangiutsinnagit, aallartinneqassaaq. Allaganngorlugu aalajangiineq nalunaarut ilanngullugu allagaataasivimmut toqqorneqassaaq.

**§ 54.** Kommunalbestyrelse kommunalbestyrelsep inuk innarluutilik pillugu suliniutinik aallartitsivigereernikuusa pillugu nalunaarummik tigusaqarpat, kommunalbestyrelsep suliaq nalilersoqqissavaa.

*Imm. 2.* Nalilersueqqinneq suliassanik suliarinnittartumit suliamik siusinnerusukkut suliaqarnikuunngitsumit ingerlanneqassaaq.

**§ 55.** Inuk innarluutilik §§ 50, 51 imaluunniit 52 malillugit nalilersuinnermut atugassatut oqaloqatigineqarsinnaavoq

*Imm. 2.* Imm. 1 naapertorlugu oqaloqatigiinneq inuk innarluutilik inersimasuunngippat inuullu innarluutillip mianerineqarnissaa tunngavissaqartitsippat angajoqqaatut oqartussaassuseqartoq nakkutiginnittorluunnit akuersitinnagit taakkulu najuutsinnagit ingerlanneqarsinnaavoq.

*Imm. 3.* Imm. 1 naapertorlugu oqaloqatigiinneq inuup innarluutillip inerisimanginnera sulialluunniit qanoq ittuunera pissutigalugit oqaloqatigiinnissap ingerlanneqarnissaanut tunngavissaqartitsinngippata ingerlanneqanngissinnaavoq.

*Imm. 4.* Inuk innarluutilik 18-it ataallugit ukioqarpat meeqqat tapersorneqarnissaanut Inatsisartut inatsisaanni § 19 naapertorlugu isumaginninnermi misissuinerup aallartinnissaanut tunngavissaqarnersoq aalajangiisoqassaaq.

**§ 56.** Inummik innarluutilimmik paarsinerluttoqarneranik, persuttaasoqarsimaneranik imaluunniit kinguaassiutitigut atonerluisoqarsimaneranik kommunalbestyrelsimut pasitsatsisisumik nalunaarutiginninnermik tigusisoqartillugu § 16 naapertorlugu qulaajaanerit aamma § 14, imm. 4 naapertorlugu tapersesuigallarnissat nalunaarutiginninnerup tiguineraniit nalunaaquttap akunnerisa 24-t iluanni aallartinneqassapput.

*Imm. 2.* Inummut innarluutilimmut innarliisoqarsimaneranik nalunaarutiginninnermi kommunalbestyrelsep inuk innarluutilik oqaloqatigissavaa. Angajoqqaatut oqartussaassusillit

ataaseq marluullutilluunniit inummut innarluutilimmut atonerluisimanerannik nalunaarutiginninnermi, oqaloqatiginninneq angajoqqaatut oqartussaassusillit akuersiteqqaarnagit najuutsinnagillu ingerlanneqassaaq.

*Imm. 3.* Imm. 1 naapertorlugu nalunaarummik tigusaqartoqarnerani, kommunalbestyrelse ingerlaannartumik politiiunut nalunaarnermik tigusaqarneq pillugu nalunaarutiginnissaaq.

**§ 57.** Kommunalbestyrelsep inuk innarluutilik paarinerlunneqartoq, nakuuserfigineqarsimasoq kinguaassiuutitigulluunniit atonerlunneqarsimasoq nammineerluni paasippagu kommunalbestyrelsep §§ 50-56 naapertorlugit iliuuseqarnissamut pisussaaffia taamatutaaq atuupput.

## **Kapitali 10**

### *Tapersersuinissamut periarfissat*

**§ 58.** Inatsisartut inatsisaat manna naapertorlugu tapersersuinissat pillugit aalajangiinerit pineqartumut suut pitsaanerpaajussanersut tamakkiisumik nalilersuiffiginerat tunngavigalugu aalajangiiffigineqassapput.

*Imm. 2.* Pissutsit inummut innarluutilimmut tunngassuteqartut pillugit sapinngisamik inuup innarluutillip nammineq isumai innimigineqassapput nammineerlunilu piginnaasatigut ineriartoreranilu killiffia pissusissamisoorumik qajassuunneqassallutik.

*Imm. 3.* Inuk innarluutilik nammineerluni toqqakkanik aalajangiussinissaminut, inuit allat apeqqaataatinnagit, kiffaanngissuseqassaaq.

*Imm. 4.* Inuk innarluutilik nammineq ikiorneqarnissaminut isumassorneqarnissaminullu tapersersorneqarnissamut aningaasaliiffigineqarsinnaavoq.

**§ 59.** Inuk innarluutilik taamaaliortoqarsinnaappat nammineerluni inigisassamik toqqaasinnaanermut tapersersorneqarsinnaatitaavoq. Inuk innarluutilik aamma inuk innarluutilimmut angajoqqaatut oqartussaassusillit immaqalu nakkutiginnittoq tamanna pillugu kissaateqarlutik oqaatigippassuk namminneq angerlarsimaffimmiissinnaanermut tapersersorneqarsinnaatitaavoq. Inuup inigisassamik nammineerluni toqqaaneratigut namminerluunniit angerlarsimaffimmiiginnarneratigut inissamik toqqaaneratigut inuup nammineq allalluunniit atugarissaarnerisa navianartorsiortinneqannginnissaa piumasqaataavoq.

*Imm. 2.* Inuk innarluutilik inuk tamassuminnga pisariaqartitsippat ineqarfissat neqeroorumiinnissamut tapersersorneqarsinnaatitaavoq.

### *Qanigisamik innarluutilimmik paarsineq*

**§ 60.** Qanigisaasumut ataatsimut, inuup innarluutillip nammineq angerlarsimaffimmini najugaqartup ulluinnarni isumassorneqarneranik isumaginnittumut, inuttullu

tapersorsorneqarnissamik isumassorneqarnissamillu aningaasaliiffigineqarsimasumut, ullup ilaannaanut kommunalbestyrelse aningaasatigut tapiissuteqartassaaq.

*Imm. 2.* Imm. 1 malillugu tapersiineq, kommunalbestyrelsip inummik isumassuisumik atorfinitsineratigut pissaaq. Inuup innarluutillip pisariaqartitsinera tunngavigineqarluni sapaatip akunneranut nalunaquttap akunnerisa 30 tikillugu atorfeqartitsiviusussat amerlassusissai, kommunalbestyrelsip aalajangersaaffigissavai.

*Imm. 3.* Naalackersuisut qanigisamik atorfinitsitsineq aamma akissarsiaqartitsineq pillugit malittarisassanik sukumiinerusunik aalajangersaassapput, takuuk imm. 1.

**§ 61.** Kommunalbestyrelsip inuk suliffeqarnermut attuumassuteqartoq inummut innarluutilimmut ataatsimut qanigisaasoq atorfinitsissinnaavaa kommunalbestyrelse ulloq unnuarlu neqeroorummi inissamik utaqqippat imaluunniit qulaajaaneq iliuusissatulluunniit pilersaarut amigarpata, aammalu:

- 1) paarlattuanik utaqqiisaasumik angerlarsimaffiup avataanut inissiigallartoqarpat,
- 2) paarisqarnissamut atugassarititaasut pilersinnissat pillugit illuatungeriit isumaqatigiissimappata aamma
- 3) kommunalbestyrelsip inuup pineqartup qanigisamik paarsaqartup eqqarsaatigisassanut pingaarutilinnut akerliunnginnissaa nalilerpagu.

*Imm. 2.* Inuk kommunimiit qanigisaasup najugaqarfianiittumiit atorfinitsinneqassaaq.

*Imm. 3.* Qanigisaasup paarineqarnissaa siunertaralugu inuk qaammatit 6-it tikillugit atorfinitsinneqarsinnaavoq. Piffissaq paarsinermut atorneqartoq tamatumunnga pissutsit immikkut ittut pisariaqartissimappassuk qaammatit 3-t angullugit sivitsuiffigineqarsinnaavoq, taamaattoq § 61 takuuk.

*Imm. 4.* Naalackersuisut qanigisamik atorfinitsitsineq aamma akissarsiaqartitsineq pillugit malittarisassanik sukumiinerusumik aalajangersaassapput, takuuk imm. 1.

**§ 62.** Kommunalbestyrelse immikkut pisoqarsimatillugu aammalu suliap pineqartup pisullu pigineqartut tigussaasumik suliatigullu nalilersuiffigereernerisigut piffissami aalajangersagaasumik § 60, imm. 3 naapertorlugu qaangiisumi angerlarsimaffimmi qanigisaasup paarinissanut § 60 naapertorlugu tapiissutinik tunniussaqaarsinnaavoq.

*Imm. 2.* Imm. 1 malillugu tapiissutit aatsaat tunniunneqarsinnaassapput:

- 1) qanigisaasup angerlarsimaffimmi paarineqarnissaa tulluarnerpaatut isigineqarpat, aamma
- 2) angerlarsimaffiup avataani paarsisarnissamut periarfissanik tulluurtunik nassaassaqaanginneranik suliatigut nalilersuiffigalugu tunngavilersukkamik inerniliiffiusumik peqartoqarnissaa.

*Imm. 3.* Imm. 1 malillugu tapiissutit sivitsuiffiginerat qaammatit 12-it angullugit sivitsuiffiginissat tunniunneqarsinnaavoq. Sivitsuinissat imm. 2-mi piumasqaatit suli naammassineqarsimappata taamaallaat tunniunneqarsinnaapput. Sivitsuinernut piffissap tamarmiusup ukiunik 10-nik qaangersinnaanngilaa.



*Inuk tapersersuisartog*

§ 63. Inummut innarluutilimmut, pingaarutilimmik timikkut, tarnikkut, silassorissutsikkut imaluunniit malugisaqarsinnaanikkut piginnaanikinnerulersimasumut, nammineq angerlarsimaffimmini nammineersinnaanissamut, najugaqaqatigiiffimmi imaluunniit najugaqarfimmi illersugaasumi imaluunniit utoqqarnut angerlarsimaffimmi isumaginninnikkut perorsaasumit tapersersorneqarnissamik pisariaqartitsisumut, tapersersortitut ikiortimik kommunalbestyrelse neqerooruteqassaaq.

*Imm. 2.* Inuk innarluutilik, taassuma tarnikkut, timikkut inooqataanikkullu ineriartorneranut kiisalu ulluinnarni suliassaminik suliaqarnissaanut tapersersortitut ikiortip ikiortassavaa, matumani angerlarsimaffiup avataani ikiuineq ilanngullugu.

*Imm. 3.* Imm. 1 malillugu aalajangiinnermut ilaatillugu sapaatip akunneranut nalunaaquttap akunnerisa ikorfartuinnermut atorneqartussat amerlassusissaat kommunalbestyrelsip aalajangersaaffigissavai.

*Imm. 4.* Kommunalborgstyrelse tapiissutit qanoq amerlatigisarnissaannut minnerpaamik ukiumoortumik ataasiaq nalilersueqqittassaaq, sapaatip akunneranullu nalunaaquttap akunneri tapersersuiffiusussat amerlassusaannut aalajangersaassalluni.

*Imm. 5.* Tapersersortitut ikiorti kommunalborgstyrelsimit atorfinitsinneqartassaaq.

*Imm. 6.* Inummik tapersersortimik atorfinitsitsisoqarsinnaassanngilaq:

- 1) ukiut kingulliit 10-t ingerlaneranni pineqartoq ilaqutariinnermut tunngasutigut pinerluuteqarsimasutut, kinguaassiuutitigut pinerluuteqarsimasutut, inummut ulorianartumik pinerluuteqarsimasutut imaluunniit aningaasannanniarluni pinerluuteqarsimasutut inuup tapersersortip pineqaatissinneqarsimannginnermik uppersarsaataani eqqartuunneqarsimasutut takuneqarsinnaappat,
- 2) pineqartoq ilaqutariinnermut tunngasutigut pinerluuteqarsimasutut imaluunniit kinguaassiuutitigut pinerluuteqarsimasutut meeqqanik pinerliisimannginnermut uppersarsaataani eqqartuunneqarsimasutut takuneqarsinnaappat.

*Ingiallorteqartitsineq*

§ 64. Inummut innarluutilimmut innarluuteqarnini pissutigalugu kisimiilluni angalaarsinnaanngitsumut kommunalborgstyrelsip qaammammut nalunaaquttap akunneri 20-t tikillugit ingiallorteqarnissaq neqeroorutigissavaa.

*Imm. 2.* Ingiallortaasoq kommunalborgstyrelsip akuersissutigissavaa atorfinitsillugulu.

*Imm. 3.* Inuup ingiallorteqarnissamut pisinnaatitaaffeqartup inuk ingiallortaasussaq nammineq siunnersuutigisinnaavaa.

*Imm. 4.* Imm. 1-ip malitsigisaata qaavatigut pineqartup sulinngiffeqarluni angalanissaa siunertaralugu, sulinngiffeqarluni angalanissaq ingiaqateqarnani piviusunngortinneqarsinnaanngippat, inummut innarluutilimmut ingiallorteqarnissaq kommunalborgstyrelsip neqeroorutigisinnaavaa.

*Imm. 5.* Sammisanut sunut ingiallorteqarusunnerluni inuup innarluutillip nammineq aalajangissavaa. Taamaattoq taamaallaat sammisanut isumaginninnermi perorsaasunit tapersorsorneqarnissamik pisariaqartitsiviunngitsunut ingiaqateqartoqarsinnaavoq.

*Imm. 6.* Najukkami piffiit assigiinngitsut ataasiaakkaat akorngani ingiaqataasup angallanneqarnermut aningaasartuutai kommunalbestyrelsip akilissavai.

*Imm. 7.* Ingiallortaasumik atorfinitsitsinnermut atatillugu kommunalbestyrelsip pineqaatissinneqarsimannginnermik uppernarsaat piniassavaa. Attuumassuteqassappallu meeqqanik pinerliisimannginnermut uppernarsaat aamma pissarsiarineqassaaq.

*Imm. 8.* Ingiallortimik atorfinitsitsisoqarsinnaassanngilaq:

1) ukiut kingulliit 10-t ingerlaneranni pineqartoq ilaqutariinnermut tunngasutigut pinerluuteqarsimasutut, kinguaassiuutitigut pinerluuteqarsimasutut, inummut ulorianartumik pinerluuteqarsimasutut imaluunniit aningaasannanniarluni pinerluuteqarsimasutut ingiallortip pineqaatissinneqarsimannginnermik uppernarsaataani eqqartuunneqarsimasutut takuneqarsinnaappat,

2) pineqartoq ilaqutariinnermut tunngasutigut pinerluuteqarsimasutut imaluunniit kinguaassiuutitigut pinerluuteqarsimasutut ingiallortip meeqqanik pinerliisimannginnermut uppernarsaataani eqqartuunneqarsimasutut takuneqarsinnaappat.

*Imm. 9.* Naalakkersuisut angalaqataaneq, assartuinnermi angalaqataaneq, najugaqarneq nerisaqarnerlu il.il. malittarisassanik sukumiinnerusunik aalajangersaasinnaapput.

#### *Nuunnermi ikiorneqarneq*

**§ 65.** Kommunalbestyrelse najugaqarfimmiit nuunnermut atatillugu aningaasartuutit matussusernissaannut meeqqamut innarluutilimmut angajoqqaatut oqartussaassusilimmut imaluunniit pisariaqarsimappat nakkutilliisumut aningaasaqarnikkut tapiissuteqarnissamik neqeroorsinnaavoq ima pisoqarsimatillugu:

- 1) angajoqqaatut oqartussaassusillit imaluunniit angajoqqaatut sinniisut maannakkut najugaanni meeqqap tapersorsorneqarnissamut isumassorneqarnissamullu pisariaqartitai naammassineqarsinnaanngippata imaluunniit iluamik piareersimaffigineqarsinnaanngippata,
- 2) Inatsisartut inatsisaat manna malillugu tapersorsorneqarnissamut meeqqap pisariaqartitai, siunissami najugariligassatut kissaatigineqartumi pitsaanerusumik naammassineqarsinnaappata, aamma
- 3) angajoqqaatut oqartussaassusillit nammineerlutik nuunnissaq kissaatigalugu erseqqissumik oqaatigisimappassuk.

*Imm. 2.* Meeqqamut innarluutilimmut angajoqqaatut oqartussaassusillit tassungaluunniit nakkutilliisut nuunnermini aningaasartuutaannut matussutissanik kommunalbestyrelse aammattaaq aningaasanik tapiissuteqarsinnaavoq, matumani aamma angajoqqaatut oqartussaassusillit imaluunniit pisariaqarsimappat nakkutilliisup illoqarfimmut allamut ulloq unnuarlu neqeroorutip inissisimaffigisaanut nuunnissaat meeqqamut pitsaanerpaajusussatut nalilerneqarsimappat. Imm. 1, nr. 1-3-mi piumasqaatit naammassineqarsimassapput.

*Eqimattakkaarluni ikiuinissaq tapersorsorneqarnissarlu pillugit neqeroorneq*

**§ 66.** Inunnut timikkut tarnikkulluunniit pisinnaasakinnerulersimasunut tunngatillugu kommunalbestyrelse eqimattakkaarluni ikiorneqarnissaq, isumassuinissaq imaluunniit tapersersuinissaq kiisalu eqimattakkaarluni sungiusarnissaq kiisalu pisinnaasanik ineriartortitsinissamut ikiorneqarnissaq pillugit aallartitsisinnaavoq imaluunniit neqeroornissamut tapiissuteqarsinnaavoq.

*Imm. 2.* Taamatut neqeroorutini peqataasarnerit ikiorneqartup massakkut pisinnaasaanut pitsanngortitsisinnaassasut imaluunniit pitsaaliuisinnaassasut, tassalu pisinnaasakinneruneq ajornerulersimassappat, imm. 1 naapertorlugu neqeroornermik aallartitsinissamut imaluunniit neqeroornermik tapiissuteqarnissamut kommunalbestyrelse nalilersuisimassasoq piumasarineqarpoq.

*Imm. 3.* Naalackersuisut eqimattakkaarluni ikiorneqarnissamut tapersorsorneqarnissamullu neqeroorutit pillugit maleruagassanik erseqqinnerusunik aalajangersaasinnaapput.

*Inunnut ataasiakkaanut isumaginninnikkut killiligaanngitsumik ikiorneqarnissaq tapiiffigineqarnissarlu pillugit neqeroorneq*

**§ 67.** Inunnut timikkut tarnikkulluunniit pisinnaasakinnerulersimasunut tunngatillugu kommunalbestyrelse piffissaligaanngitsumik inunnut ataasiakkaanut ikiuinissaq, isumassuinissaq tapersersuinissarluunniit kiisalu piffissami killilikkami inunnut ataasiakkaanut pisinnaasanik sungiusaanissamut ikiunissamullu aallartitsisinnaavoq imaluunniit neqeroornermut tapiissuteqarsinnaavoq. Neqeroorneq ataasiartumik qaammatit 6-it tikillugit tunniunneqarsinnaavoq.

*Imm. 2.* Neqeroorneq tiguisussap massakkut pisinnaasaanik pitsanngortitsisinnaassasoq imaluunniit pisinnaasakinnerulerneq imaluunniit inuuniarnikkut ajornartorsiutit ajornerulernissaannut pitsaaliorneqarsinnaassasut, imm. 1 naapertorlugu neqeroornermik aallartitsinissamut imaluunniit neqeroornermik tapiissuteqarnissamut kommunalbestyrelse nalilersuisimassasoq piumasarineqarpoq.

*Imm. 3.* Naalackersuisut eqimattat ikiorneqarnissaannut tapersorsorneqarnissaanullu neqeroorutit pillugit malittarisassanik allanik aalajangersaasinnaapput.

*Oqilisaaneq*

**§ 68.** Kommunalbestyrelse inummut innarluutilimmut oqilisaasarnermut najugaqarfimmik neqeruussaq:

1) isumassuinermi suliassaq, angajoqqaanut imaluunniit ilaquataasunut allanut isumassuinermik isumaginnittunut annertuumik suliaqarnerunermik malitseqartarpat, aamma

2) angajoqqaat, ilaquataasut allat ilaqutariilluunniit paarsisartut isumassuineramik isumaginniinnarsinnaanissaannut oqilisaassinissaq pisariaqarpat.

*Imm. 2.* Inuk innarluutilik imm. 1 naapertorlugu oqilisaaffigineqarnissamik neqeroorfigineqarpat, kommunalbestyrelse najugaqarnermi atugassarititaasut pillugit oqilisaaffiusumik allakkatigut isumaqatigiissusiussaaq.

*Imm. 3.* Oqilisaassisoqarnissaanik aalajangiinermi kommunalbestyrelse ilaqutariinnut paarsisartunut imaluunniit ulloq unnuarlu neqeroorummut akissarsiassanik akuersissuteqassaaq. Oqilisaanerup nalaani aningaasarsiarineqartut inuup pilersorneqarneranut aningaasartuutinut ilaanngillat.

*Imm. 4.* Oqilisaassinermut atatillugu pilersuinermut akiligassat pilersuisussaataasumit akilerneqassapput.

*Imm. 5.* Inuk innarluutilik ilaqutariillu paarsisartut imaluunniit ulloq unnuarlu neqeroorut pineqartup angerlarsimaffittut kommuniani kommunalbestyrelse suleqatigalugu pilersuinerup qanoq akilertarnissaa pillugu isumaqatigiissuteqassaaq. Inuk innarluutilik 18-it ataallugit ukioqarsimappat imaluunniit oqartussaassuseqanngippat angajoqqaatut oqartussaassusilik imaluunniit nakkutillisoq inuk innarluutilik sinnerlugu isumaqatigiissusiussapput.

*Imm. 6.* Ukiup siuliani kingusinnerpaamik 15. novemberimi nittartakkatigut nalunaarutit.gl-imi oqilisaassinermi aningaasarsiat saqqummiunneqassapput.

#### *Ikiorsiissutit allat*

**§ 69.** Ikiorsiissutit sorliit kommunalbestyrelsip neqeroorutigissanerai Naalakkersuisut malittarisassanik erseqqinnerusunik aalajangersaassapput, ilaatigut:

- 1) ikiuutit,
- 2) inigisap allanngortinneqarnera,
- 3) qamutit motorillit,
- 4) ataatsimoortunik angallassinermik aaqqissuussineq,
- 5) aningaasartuuteqarneruneq,
- 6) suliffissaqartitsinermut, sammisassaqartitsinermut katerisimaaqateqarnissamullu neqeroorutit,
- 7) pikkorissaanerit atuartinneqarnerillu, matumani qanigisat ilanngullugit aamma
- 8) sungiusarneq.

#### *Pissassarfimmi piginnaanngorsarneqarneq piginnaanngorsaqqinneqarnerlu*

**§ 70.** Inuup piginnaaneqarnerminik attassiinnarnissaanut tamanna annertuumik pingaaruteqartoq isumaqartoqarpat Pissassarfimmi inuup innarluutillip piginnaanngorsarneqarnissaanik piginnaanngorsaqqinneqarnissaanillu neqerooruteqarnissaq pillugu kommunalbestyrelse allaganngorlugu aalajangiisinnavoq, matumani piffissami killilimmi najugaqarnissaq ilanngullugu.

*Imm. 3.* Malitseqartitsineq pillugu, tassunga ilanngullugit malitseqartitsinerup annertussusaa, sivilissusaa aamma qanoq ittuunera pillugit Naalackersuisut malittarisassanik sukumiinerusunik aalajangersaasinnaapput.

### *Malitseqartitsineq*

**§ 71.** Kommunalbestyrelsep inuusuttoq innarluutilik Inatsisartut inatsisaat una malillugu tapersersorneqartoq 16-inik ukioqalerpat inersimasunngornissamut ikaarsaariarnissaata piareersarnissaa aallartissavaa. Suliniuteqarnermi ilaavoq inuusuttut 18-ini 23-nut ukiullit inuusuttunngornissamut nammineerlunilu inuunissamut piareersarnissaat, tassunga ilanngullugu inuusuttup ineriartorneranik atugarissaarneranillu, ilinniagaqarneranik, suliffeqarneranik pissutsinillu allanik naleqquttunik, tassunga ilanngullugu namminerisamik inissamik pissarsinissamik tapersuisoqarnissaa,

*Imm. 2.* Imm. 1 aamma angajoqqaatut oqartussaassusillit imaluunniit nakkutilliisut Inatsisartut inatsisaat manna tunngavigalugu taamaallaat inuusuttup malunnartumik ataavartumillu timikkut tarnikkulluunniit pisinnaasakinnerulersimanera imaluunniit nappaammik katsorsarneqarsinnaanngitsumik sivilissuomillu suliarisariaqakkamik atugaqarnera aallaavigalugu ikiorneqarnermik tunineqartunut atuutsinneqarpoq.

*Imm. 3.* Naalackersuisut malitseqartitsineq pillugu malittarisassanik sukumiinerusunik aalajangersaasinnaapput, tassunga ilanngullugit malitseqartitsinerup annertussusia, sivilissusia suussusaalu.

**§ 72.** § 70 malillugu piareersaanissaq suliffeqarfitt assigiinngitsut aqutugalugit suliaassaaq tamakkiisumillu isiginnittuussalluni aammalu inuusuttumik taassumalu ilaqutaanik oqaloqateqarnerit aqutugalugit ingerlanneqassalluni. Piareersaaneq pisumi pineqartumi oqaatiginiarneqartuniit annertunerussanngilaq.

*Imm. 2.* Imm. 1 malillugu piareersaanermi inuusuttumut tunngatillugu pissutsit makku pillugit isummersornerit ilaassapput:

- 1) Pisinnaasakinnerulernerup imaluunniit nappaatip kingunerisaannik suliniuteqarnissamut tapersersuinissamillu pisariaqartitsineq.
- 2) Ilinniarneq.
- 3) Suliffeqarneq pilersuinissamullu tunngavissaqarneq.
- 4) Ineqarnermi pissutsit.
- 5) Inuuniarnikkut atugarisat.
- 6) Pissutsit attuumassutillit allat.

*Imm. 3.* Imm. 1 malillugu nuunnissap piareersaaffiginera naammassineqarsimassaaq, taamaaliornikkut siunissami suliniutissat tapersersuinissallu pillugit kommunalbestyrelse allaganngorlugu aalajangiisinnaassammat, taamaasillunilu tamanna inuusuttup 18-ileereernerata kinguninngua aallartinneqarsinnaassammat. Tamanna aamma inuup iliuusissatut pilersaarutaani atuarneqarsinnaassaaq, takuuk § 47.

§ 73. §§ 70-71 naapertorlugit suliniuteqarneq nammineerluni pitsaasumik inuuneqalernissamut tapeeqataassaaq, soorlu inuusuttup ineriartorneranut atugarissaarnissaanullu, ilinniarnissaanut, suliffeqalernissaanut pissutsinullu allanut tapersersuinissaq qitiutillugu, taakkununga namminerisamik initaarnissaq ilanngullugu.

*Illerfinnik assartuineq*

§ 74. Inuk innarluutilik najugaqarfissatut neqeroorummi, nunagisap avataaniittumi najugaqartoq najugaqarnermini toqukkut qimaguppat, illerfiup assartornissaanut aningaasartuutit tamakkiisumik ilaannakortumilluunniit matussutissaanut kommunalbestyrelse tunniussisinnaavoq.

*Imm. 2.* Inatsit alla malillugu illerfiup assartornissaanut aningaasartuutitut tapiisoqarsinnaanngippat, imm.1 taamaallaat atuussinnaavoq.

*Tapersersuinissamut periarfissat allanngornerat unitsinnerallu*

§ 75. Kapitali 8-mi aalajangersakkat malillugit, inummut innarluutilimmut tapersiineq allanngortinneqassanersoq atorunnaarsinneqassanersorluunniit pillugit kommunalbestyrelse aalajangiissaaq, tapersiinerup inuup pisariaqartitaanut naammassinniffiusinnaajunnaarnera kommunalbestyrelsip ilisimalerpagu.

*Imm 2.* § 46 malillugu tapersiinerup allanngortinneqarnissaa imaluunniit atorunnaarsinneqarnissaa pillugit aalajangiisoqannginnerani, inuk innarluutilik tassungalu angajoqqaatut sinniisoqarsimaguni sinniisup imaluunniit angajoqqaatut akisussaasut kommunalbestyrelsip oqaloqatigisimassavai.

*Imm. 3.* § 47 malillugu tapersiinerup unitsinneqarnissaanik aalajangiisoqannginnerani kommunalbestyrelse inummut innarluutilimmut iliuusissatut pilersaarummik suliaqarsimassaaq.

*Paasissutissinissamut utertitsillunilu akiliinissamut pisussaaffik*

§ 76. Inuk innarluutilik, Inatsisartut inatsisaat manna malillugu tapersiivigineqarnissamik qinnuteqartoq, kommunalbestyrelsip piunaffigisinnaavaa:

- 1) paasissutissanik inuup qanoq tapersiivigineqarnissamut pisinnaatitaanerani kommunalbestyrelsip aalajangiisinnaanissaanut pisariaqartunik pissarsiniarnermi peqataassasoq, aamma
- 2) § 17 malillugu nakorsamit misissortissasoq imaluunniit malinnaavigineqarnissamut unitsinneqassasoq qulaajaanermullu ilaatillugu katsorsartissinnaassasoq.

*Imm. 2.* Inuup innarluutillip tassungalu nakkutilliisup imaluunniit angajoqqaatut oqartussaassusillip akuersinerisigut, oqartussanit allanit inummut tunngasunik

ilisimasaqartunit imaluunniit inummik innarluutilimmik ilisarimannittunit paasissutissanik, Inatsisartut inatsisaat manna malillugu tapersersorneqarnissaq pillugu qinnuteqaatip suliarineqarsinnaanissaanut pisariaqartutut isigineqartariaqartunik, kommunalbestyrelse piniarsinnaavoq, taamaattoq takuuk imm. 3.

*Imm. 3.* Inuk innarluutilik kingunissaasinnaasut pillugit ilisimatinneqareerluni akuersissummik tunniussisinnaanngippat, aamma taassuma angajoqqaatut oqartussaasuanit imaluunniit nakkutilliisuanit akuersissut pineqarsinnaasimannngippat, tamanna inuup soqutigisaasa nakkutigineqarnissaannut pingaaruteqarpat, kommunalbestyrelsip paasissutissat inummut tunngasut pissarsiariniarsinnaavai.

**§ 77.** Inuk innarluutilik Inatsisartut inatsisaat manna malillugu tapersersorneqartoq, tassungalu nakkutilliisoq imaluunniit angajoqqaatut oqartussaasui inummut innarluutilimmut tunngasuni allannguutit tamaasa, tapersersuinerup tamakkiisumik ilaannakuusumilluunniit allanngortinneqartariaqarnerannik imaluunniit unitsinneqarnissaannik malitseqarsinnaasut pillugit kommunalbestyrelsip ilisimatinnissaanik pisussaaffeqarput.

*Imm. 2.* Inuup imm. 1-imi paasissutissiisussaataaneq taaneqartoq naammassinngippagu imaluunniit ilisimareeraluarlugu Inatsisartut inatsisaat manna malillugu tapersiissutinik pisinnaatitaanani tigusaqarsimappat, kommunalbestyrelsip tiguneqarsimasut utertillugit akilerneqassasut imaluunniit utertillugit tunniunneqassasut piumasarisinnaavaa. Utertitsisoqarnissaanut imaluunniit tunniusseqqittoqarnissaanut piumasaqartoqassappat inuup, taassuma nakkutilliisua imaluunniit angajoqqaatut oqartussaasua tapiissutit tunniunneqartut pisariaarussimanerannik ilisimasaqarnissaat imaluunniit ilisimannereersimanissaat piumasarineqarpoq.

*Imm. 3.* Uterteqqusinissaq imaluunniit tunniusseqqinnissaq piffissamiit inuup innarluutillip, taassuma nakkutilliisuata imaluunniit angajoqqaatut oqartussaassuseqartuata tapiissutit tunniunneqartut pisariaarussimanerannik ilisimasaqareersimanissaat piumasarineqarsinnaavoq.

## **Kapitali 11**

### *Tikeraarluni angalanerit*

**§ 78.** Inuk innarluutilik 18-it sinnerlugit ukiulik nunagisaminut ukiumut ataasiarluni akiliunneqarluni tikeraarluni angalasinnaatitaavoq, piumasaqaatit makkua naammassineqarsimappata, taamaattoq takuuk imm. 3 aamma 4:

- 1) inuk § 22, malillugu inuk najugaqaqatigiiffimmiippat, § 24, malillugu najugaqarfimmi illersugaasumiippat, imaluunniit § 29 malillugu ulloq unnuarlu neqeroorummiippat, aamma
- 2) najugaqarfissatut neqeroorut inuup nunagisaata avataani inissisimappat.

*Imm. 2.* Inuk innarluutilik nammineerluni angalasinnaanngippat imaluunniit angalanissaq ajornarpat, inuullu innarluutillip kissaatigippagu, tikeraarluni angalaneq qanigisaasumut ataatsimut marlunnulluunniit tunniunneqassaaq, taamaalilluni qanigisaasup

qanigisaasulluunniit inuk najugaqarfissatut neqeroorummi najugaqarfigisaani tikeraarsinnaaniassammassuk.

*Imm. 3.* Imm. 1-2 malillugit tikeraarluni angalanerit pillugit aalajangersakkat inunnut innarluutilinnut Kalaallit Nunaata avataani ulloq unnuarlu neqeroorummiittunut taamaaqataanik atuupput, takuuk §§ 35 imaluunniit 36. Inuk 18-it aamma 24-t akornanni ukioqartoq, imm. 1, oqaaseqatigiit siulliit apequtaatinnagit, Kalaallit Nunaata avataani ulloq unnuarlu neqeroorummiikkallartoq, nunagisaminut ukiumut marloriarluni tikeraarluni angalanissamut akiliunneqarnissamik pisinnaatitaavoq. Inuk, ukiumi inuup 24-nik ukioqalerfiani, marloriarluni tikeraarluni angalanernut akiliunneqarnissamik pisinnaatitaaffeqarpoq.

*Imm. 4.* Imm. 1, 3 aamma 4 malillugit nunagisamut tikeraarluni angalanerup ajornakusoornera, ikiortissanik periarfissaqannginnera imaluunniit nunagisami atortorissaaruteqannginnera pissutaallutik, ajornarpat, illoqarfimmut nunagisap qanittuaniittumut tunniunneqarsinnaavoq. Tamatuma peqatigisaanik illoqarfimmut tassunga qanigisaasunut amerlanerpaamik marlunnut angalanermut najugaqarnermullu tunniussisoqassaaq.

*Imm. 5.* Imm. 1-4 naapertorlugit tikeraarluni angalasinnaatitaaneq, inunnut innarluutilinnut eqqartuussut imaluunniit eqqartuussiviup aalajangenera naapertorlugu ulloq unnuarlu neqeroorummi najugaqartinneqartunut atuutinngilaq.

**§ 79.** § 29 malillugu meeraq innarluutilik, meeqqap nunaginngisaani ulloq unnuarlu neqeroorummi inissinneqarsimasoq, nunagisaminut ukiumut 2-riarluni akiliunneqarluni tikeraarluni angalasinnaatitaavoq. Meeraq 18-iliinissami tungaanut katillugit ukiumut marloriarluni akiliutsilluni tikeraarluni angalasinnaatitaavoq.

*Imm. 2.* Meeqqamut pitsaanerpaajuppat, tikeraarluni angalaarneq angajoqqaatut akisussaasunut imaluunniit qanigisamut 1-mut 2-nulluunniit tunniunneqarsinnaavoq, taamaalilluni taakku meeraq ulloq unnuarlu neqeroorummi tikeraarniassammassuk.

*Imm. 3.* Meeqqamut innarluutilimmut tikeraarluni angalanermik 1-mik suli tunniussisoqassaaq, meeqqap angajoqqaatullu akisussaasut akornanni attaveqarnissaq pisariaqartinneqarpat, aamma meeqqap pisariaqartitaanut naleqquppat.

*Imm. 4.* §§ 36 imaluunniit 37 malillugit meeqqamut innarluutilimmut Kalaallit Nunaata avataanut inissinneqarsimasumut imm 1-3-mi tikeraarluni angalasarneq pillugu aalajangersakkat assinganik atuutsinneqarput.

*Imm. 5.* Imm. 1, 3 aamma 4 malillugit nunagisamut tikeraarluni angalanerup ajornakusoornera, ikiortissanik periarfissaqannginnera imaluunniit nunagisami atortorissaaruteqannginnera pissutaallutik, angalanissaq ajornarpat, illoqarfimmut nunagisap qanittuaniittumut tunniunneqarsinnaavoq. Tamatuma peqatigisaanik annerpaamik qanigisaasunut marlunnut illoqarfimmut tassunga angalanerannut tassanilu najugaqarnerannut ikiorsiisoqassaaq.



*Imm. 6.* Imm. 1-4 malillugu tikeraarluni angalasinnaatitaaneq, meeqqanut innarluutilinnut eqqartuussut naapertorlugu imaluunniit eqqartuussivimmi tamanna pillugu aalajangiineq malillugu ulloq unnuarlu neqerorummi najugaqartinneqartunut atuutinnigilaq.

**§ 80.** Angalanermut kiisalu ullut unnuallu 9-t tikillugit unnuiffissanut aningaasartuutit inuup innarluutilip kommunimi angerlarsimaffigisaani kommunalbestyrelsip akilissavai. Tikeraarluni angalanerup aallartinnerani naanerani angalanerup sivilissusaa ulloq unnuarlu 9-nut taaneqartunut ilanngullugit naatsorsuiffigineqassanngillat. Tamatuma saniatigut kommunalbestyrelsip makku aningaasartuutigissavai:

- 1) inummut innarluutilimmut pisarialimmik tapersersuinernut, soorlu §§ 36 aamma 37 malillugit tikeraarluni angalanernut atatillugu ingiaqateqarnerit tapiissuteqarnissamullu iliuusissat immikkut ittut.
- 2) angalanerup nalaani ingiaqataasunut, kiisalu ingiaqataasut angerlarsimaffiisa aamma najugaqarfissatut neqerootip akornanni angalaneq, aamma
- 3) §§ 78, imm. 2 aamma 79, imm. 2 malillugit angajoqqaatut oqartussaassusillit imaluunniit qanigisaasut allat angalanerannut inissaqartinnissaannullu.

*Imm. 2.* Inuk innarluutilik Kalaallit Nunaanni najugaqarsimappat, §§ 36 imaluunniit 37-mi pineqartunut ilaangippat, taannalu nammineq akilikkaminik sulinnigiffeqarpat, ingiaqateqarnanilu sulinnigiffeqarsinnaanngippat, kommunalbestyrelsip ullut 9-t tikillugit ingiaqateqarnissaq ikiorsiissutigisinnaavaa. Tikeraarluni angalanerup aallartinnera naaneralu ulluni unnuanilu 9-ni pineqartuni ilaatinneqassanngillat.

*Imm. 3.* Imm 2 malillugu ingiaqataasup angalaneranut najugaqarneranullu aningaasartuutaasut tamakkiisumik ilaannakuusumilluunniit akilerneqarnissaannut ikiorsiissuteqartoqarsinnaavoq. Ingiaqataasoq qanigisaasimanngippat, taamatuttaaq makkununga akiliinissamut ikiorsiisoqarsinnaavoq:

- 1) ullormusianut,
- 2) ingiaqataasup akissarsiassaanut, aamma
- 3) sulinerup atatillugu aningaasarsianut annaasanut taarsiissutissanut.

*Imm. 4.* Inummut innarluutilimmut 18-it sinnerlugit ukiulimmut taamaallaat ukiut 3-kkuutaarlugit imm. 2 malillugu ikiorsiisoqarsinnaavoq.

*Imm. 5.* Imm. 2 malillugu ukiut tamaasa meeqqamut innarluutilimmut ikiorsiisoqarsinnaavoq.

*Imm. 6.* Imm. 1, nr. 1-3 aamma aamma imm. 2 malillugit naalagaaffeqatigiit avataannut tikeraarnerup aamma sulinnigiffeqarnerup atatillugu angalanerup aningaasartuutit kommunalbestyrelsip akilersinnaanngilai.

*Imm. 7.* Tikeraarluni angalanerit aaqqissuunneqartarnerat aamma aningaasartuutit akilerneqartarnerat pillugit maleruagassanik Naalakkersuisut aalajangersaasinnaapput.

**§ 81.** Inuk innarluutilik § 77 imaluunniit § 78 naapertorlugit tikeraarluni angalasinnaatitaavoq, aammattaaq qanigisaasup perululluni napparsimanerani, toqunerani

imaluunniit ilisaaneranut atatillugu Kalaallit Nunaannut imaluunniit Kalaallit Nunaata iluani angalanermut 1-imut akiliunneqarnissaminut pisinnaatitaavoq.

*Imm. 2.* Angalanermut kiisalu ullut unnuallu 9-t tikillugit unnuiffissanut aningaasartuutit kommunalbestyrelsip akilissavai, ullut angalaffiusut ilanngunnagit. Tikeraarluni angalanerini angalanerup aallartinnera naaneralu ulluni unnuanilu 9-ni pineqartuni ilaatinneqassanngillat. Tamatuma saniatigut kommunalbestyrelsip makku aningaasartuutigissavai:

- 1) tapersersuineranut pisariaqartumut, matumani ingiaqateqarneq aamma imm. 1 malillugu angalanermut atatillugu tapersersuinissamut iliuusissat ilanngullugit, aamma
- 2) angalanerup nalaani ingiaqataasunut, kiisalu ingiaqataasut angerlarsimaffiisa aamma najugaqarfissatut neqeroorutip akornanni angalaneq.

*Imm. 3.* Angalanerit aqqissuunneqarneri taakkunungalugu atatillugu aningaasartuutit akilerneqarneri pillugit maleruagassanik Naalakkersuisut aalajangersaasinnaapput.

**§ 82.** Inuk innarluutilik, §§ 36 imaluunniit 37 malillugit tikeraarluni angalasinnaatitaasoq, annertuumik nalliuttorsiorpat imaluunniit perululluni napparsimappat, ilaqttani qanigisanut amerlanerpaamik 2-nut Kalaallit Nunaannut imaluunniit Kalaallit Nunaata iluani angalanissamut kommunalbestyrelse tapiissuteqarsinnaavoq.

*Imm. 2.* Tikeraarluni angalanerit aqqissuunneqartarnerat aamma aningaasartuutit akilerneqartarnerat pillugit maleruagassanik Naalakkersuisut aalajangersaasinnaapput.

## **Kapitali 12**

### *Nakkutilliineq*

**§ 83.** Kapitali 4-5-imi aalajangersakkat malillugit inummut innarluutilimmut najugaqarfissatut neqeroorummiittumut, inummut sammititamik kommunimi angerlarsimaffigisami kommunalbestyrelse nakkutilliissaaq. Nakkutilliinerminut ilaatillugu, najugaqarfissatut neqeroorummiinnermi inuup timikkut, tarnikkut inooqatigiinnikkullu pisariaqartitai suli naammassineqarnersut kommunalbestyrelsip qulakkiissavaa.

*Imm. 2.* Imm. 1 malillugu nakkutilliineq nalunaaqqaarluni nalunaaqqaarnaniluunniit nakkutilliinertut ingerlanneqarsinnaavoq.

*Imm. 3.* Naalakkersuisunit qinnuigineqarneq tungavigalugu, kommunalbestyrelsip nakkutilliinerminik ingerlatsineranut paasissutissat kissaatigineqartut tamaasa nassiunneqarnissaat, kommunalbestyrelsip pisussaaffigaa.

*Imm. 4.* Imm. 1 malillugu inummut sammititamik nakkutilliinerminut maleruagassanik erseqqinnerusunik Naalakkersuisut aalajangersaasinnaapput, matumani ilanngullugit:

- 1) kommunalbestyrelsip nakkutilliisussaatitaanerminik ingerlatsinera,
- 2) nakkutilliinerminik aqqissuussinera,
- 3) nakkutilliisussaatitaanerup naammassineqarnissaanut atugassarititaasut piumasaqatillu, aamma
- 4) kommunalbestyrelsip nakkutilliinerminut nalunaarusiamik suliaqartarnera.

**§ 84.** Kommunalbestyrelse nalinginnaasumik inummut sammititamik nakkutilliinermi paasisaqarpat imaluunniit pissutsinik ernumanarluinnartunik ilisimasaqalerpat kommunalbestyrelse nakkutilliinermik sakkortusisamik inummut sammititamik aallartitsissaaq.

*Imm. 2.* Kommunalbestyrelse inunnt innarluutilinnut pissutsit sakkortuut ernumanartut pillugit iliuusissatut pilersaarummik suliaqassaaq. Iliuusissatut pilersaarut pisariaqanngitsumik uninnani suliarineqassaaq.

*Imm. 3.* Iliuusissatut pilersaarut najugaqarfiup pisortaanik oqaloqateqarnikkut suliarineqassaaq, tassanilu nassuiarneqassaaq atugassarititat toqqiissisimanartut qanoq isillugit suliarineqassanersut pissutsillu ernumanarluinnartut ikiorsiiffigineqassanersut.

*Imm. 4.* Naalakkersuisut inummut innarluutilimmut inummut sammititamik nakkutilliinermut sakkortusisamut kommunalbestyrelsimut maleruagassanik sukumiinerusunik aalajangersaasinnaapput.

**§ 85.** Najugaqaaqatigiiffinnut aamma najugaqarfinnut illersugaasunut kapitali 4 malillugu kommunalbestyrelsimit pilersinneqarlutillu ingerlanneqartunut, ingerlatsinermut sammititamik kommunalbestyrelse nakkutilliissaaq.

*Imm. 2.* Imm. 1 malillugu nakkutilliineq nalunaaqqaarluni nalunaaqqaarnaniluunniit nakkutilliinertut ingerlanneqarsinnaavoq.

*Imm. 3.* Naalakkersuisunit qinnuigineqarneq tunngavigalugu, kommunalbestyrelsip nakkutilliinermik ingerlatsineranut paasissutissat kissaatigineqartut tamaasa nassiunneqarnissaat kommunalbestyrelsip pisussaaffigaa.

*Imm. 4.* Imm. 1 malillugu ingerlatsinermut sammititamik nakkutilliinermut maleruagassanik erseqqinnerusunik Naalakkersuisut aalajangersaasinnaapput, matumani ilanngullugit:

- 1) kommunalbestyrelsip nakkutilliisussaataanerminik ingerlatsinera,
- 2) nakkutilliinermik aaqqissuussinera,
- 3) nakkutilliisussaataanerup naammassineqarnissaanut atugassarititaasut piunasaqaatillu, aamma
- 4) kommunalbestyrelsip nakkutilliinermut nalunaarusiaanik suliaqartarneq.

**§ 86.** Qitiusumik nakkutilliinermik ingerlatsivimmik Naalakkersuisut peqassapput (nakkutilliinermik ingerlatsivik).

*Imm. 2.* Kommunalbestyrelsip Inatsisartut inatsisaanni matumani maleruagassanik ingerlatsineranik allaffissornikkullu aqutsineranik pingaarnertut nakkutilliinermik ingerlatsivik nakkutilliissaaq.

*Imm. 3.* § 28-mi aalajangersakkat malillugit ulloq unnuarlu neqeroorutitut pilersinneqarsimasunut ingerlatsinermut sammititamik nakkutilliinermik ingerlatsivik nakkutilliissaaq.

*Imm. 4.* Nakkutilliinermik ingerlatsiviup imm. 3 malillugu ingerlatsinermut sammititamik nakkutilliinermiut ilaatillugu, ulloq unnuarlu neqeroorutini pissutsit nakkutigissavai aammalu ulloq unnuarlu neqeroorummik oqaloqateqarneq ingerlatissallugu.

*Imm. 5.* Imm. 2 aamma 3 malillugit nakkutilliineq nalunaaqqaarluni nalunaaqqaarnaniluunniit nakkutilliinertut ingerlanneqarsinnaavoq.

*Imm. 6.* Ingerlatsinermut sammisumik nakkutilliinerup aaqqissuunneqarnera aammalu imarisassai pillugit maleruagassanik erseqqinnerusunik Naalakkersuisut aalajangersaassapput.

**§ 87.** Nakkutilliinermik ingerlatsiviup pisariaqartumik kinaassutsimut uppersaammik takutitsinermigut eqqartuussivimmiillu aalajangiinertaqanngitsumik, paasissutissat kommunip ingerlatsiviata pigisai tamaasa § 78, imm. 2 malillugu nakkutilliinermiut naleqquttuosorisatik takusinnaavaat, tamatumunnga aamma ilaapput paasissutissat inunmut tunngasut mianerisariaqartut kiisalu suliffiup iluani allattugaatigineqartut.

**§ 88.** Nakkutilliinermik ingerlatsivik, § 86, imm. 2 malillugu nakkutilliinermut atatillugu, allaganngorlugu nakkutilliinermut nalunaarusiamik suliaqassaaq tassanilu nakkutilliineq pillugu kommunalbestyrelsimut najoqqutarineqarsinnaasunik piumasaqaateqassalluni.

Nakkutilliinermik ingerlatsivik aammattaaq nakkutilliineq tunngavigalugu

kommunalbestyrelsimut pisussaaffiliisumik makkuninnga peqqusissuteqarsinnaavoq:

1) Inatsisartut inatsisaat manna aallaavigalugu kommunalbestyrelsip § 16 malillugu suliani

ingerlanneqartuni sullissinermik qulaajaaneq aallartissagaa, imaluunniit § 47 malillugu iliuusissatut pilersaarusiussasoq, taakkulu suliamik suliaqarnermi aallartitsinerit piffissap nakkutilliinermik ingerlatsiviup aalajangigaata iluani naammassineqarsimassapput. Suliap imaluunniit suliat qanoq ingerlanerat pillugu nakkutilliinermik ingerlatsiviup

kommunalbestyrelsip ataavartumik paasissutissiisarnissaa piumasaqaatigisinnaavaat,

2) Nakkutilliinermik ingerlatsiviup nakkutilliinermiut atatillugu naliliippat, suliani pineqartuni kommunalbestyrelse Inatsisartut Inatsisaanni matumani aalajangersakkanik malinnissimangitsoq, kommunalbestyrelse suliamik naammassineqarsimasumik kingumut aallartitseqqissaq, aamma

3) Nakkutilliinermik ingerlatsivimmiut nalilerneqarpat suliami ingerlasumi imaluunniit naammassineqarsimasumi najugaqarfissami neqeroorummiinnissaq pisariaqartinneqartoq, tamannali neqeroorutigineqarsimangitsoq, § 17 malillugu Nakkutilliinermik ingerlatsivimmit piffissaliunneqartup iluani kommunalbestyrelsip qulaajaaneq aallartissavaa.

**§ 89.** § 86, imm. 3 malillugu ulloq unnuarlu neqeroorummit nakkutilliinermut ingerlatsiviup ingerlatsinermut sammititamik nakkutilliinerannut atatillugu paasissutissat pisariaqartinneqartut tunniunneqarnissaat Nakkutilliinermik ingerlatsiviup pisinnaatitaaffigaa.

**§ 90.** § 86, imm. 3, malillugu nakkutilliinermik ingerlatsiviup nakkutilliinermiut atatillugu ulloq unnuarlu neqeroorummot peqqussuteqarsinnaavoq. Peqqussutip naammassineqarnissaanut nakkutilliinermut ingerlatsivik piffissaliisinnaavoq.

*Imm. 2.* § 86, imm. 3, malillugu ulloq unnuarlu neqeroorutini ataasiakkaani pissutsit taamaattussaattippassuk, annertusisamik nakkutilliinissaq pillugu nakkutilliinermut ingerlatsivik allaganngorlugu aalajangiisnaavoq.

*Imm. 3.* Imm. 2 malillugu nakkutilliinermik ingerlatsivik peqqussuteqarpat imaluunniit annertusisamik nakkutilliinissamik aalajangiippat, kommunalbestyrelsit inissiisimasut nakkutilliinermik ingerlatsiviup nalunaarfigissavai.

*Imm. 4.* Qaqugukkut annertusisamik nakkutilliinermik aallartitsisoqarsinnaanersoq, aammalu qaqugukkut peqqusissuteqartoqarsinnaanersoq pillugit maleruagassat erseqqinnerusut Naalakkersuisut aalajangersaaffigissavaat.

### **Kapitali 13**

*Inunnut innarluutilinnut siunnersuisoqatigiit, inunnut innarluutilinnut politiki aamma pitsaassusissanut piumasagaatit*

**§ 91.** Kommunalbestyrelse innarluutillit pillugit siunnersuisoqatigiinnik pilersitsissaaq. Inunnut innarluutilinnut siunnersuisooqatigiit inunnut innarluutilinnut politikikkut apeqqutini kommunalbestyrelsimut siunnersuissapput aammalu innuttaasup aamma kommunalbestyrelsip akornanni najukkami politikikkut apeqqutit tamaasa, inunnut innarluutilinnut tunngasut pillugit isummersuutini ingerlatitseqqittassallutik.

*Imm. 2.* Kommunalbestyrelsip inunnut innarluutilinnut suliniutit pingaarutillit tamaasa pillugit innarluutilinnut siunnersuisoqatigiit tusarniaaffigissavai.

*Imm. 3.* Inunnut innarluutilinnut siunnersuisooqatigiit apeqqutit inunnut ataasiakkaanut tunngasut suliarisinnaanngilaat.

*Imm. 4.* Inunnut innarluutilinnut siunnersuisooqatigiinni ilaasortat sisamat aamma arfineq pingasut akornanni amerlassuseqarput. Innarluutilinnut tunngasunut soqutigisaqartut suliatiqullu ilisimasaqartut tamaasa ilaasortaasinnaapput.

*Imm. 5.* Inunnut innarluutilinnut siunnersuisooqatigiit pisariaqartumik allattoqarfeqarnermut tunngasunik suliaasaataannut kommunalbestyrelse ikiutissaaq.

*Imm. 6.* Inunnut innarluutilinnut siunnersuisooqatigiit suliaqarnerat katitigaanerallu pillugit maleruagassanik erseqqinnerusunik kommunalbestyrelse aalajangersaasnaavoq.

**§ 92.** Inunnut innarluutilinnut ataqatigiissumik politikimik kommunalbestyrelse ilusilersuissaaq. Inuit innarluutillit qanoq sullinneqarnissaat naatsorsuutigineqarsinnaanersoq imaluunniit qanoq pisinnaatitaaffeqarnermut pillugit, inunnut innarluutilinnut politiki paasissutissanik imaqassaaq. Kommunalbestyrelsip qanoq iliorluni inunnut innarluutilinnut tunngasut kommunimi suliaasaqarfinni tamani politikini pilersaarusiornernilu aamma

ilanngutsinnissaat qulakkiissaneraa pillugu, inunnut innarluutilinnut politiki paasissutissanik imaqaassaaq.

*Imm. 2.* Kommunip inunnut innarluutilinnut politikimik suliaqarneranut inunnut innarluutilinnut siunnersuisooqatigiit kommunalbestyrelsip akuutissavai.

*Imm. 3.* Inunnut innarluutilinnut politiki allaganngorlugu ilusilersorneqassaaq aammalu kommunip nittartagaani tamanut saqqummiunneqassalluni kiisalu Naalakkersuisunut ilisimatitsissutitut nassiunneqassalluni.

*Imm. 4.* Inunnut innarluutilinnut politiki sivisunerpaamik ukiut sisamakkaarlugit kukkunersiorneqartassaaq.

**§ 93.** Kapitali 8 malillugu inunnut innarluutilinnut tapersiisarnerup pitsaassusissaanut piunasaqaatinik kommunalbestyrelse aalajangersaassaaq. Pitsaassutsinut piunasaqaatit tapersiinerit ataasiakkaat suussusiisa imarisai, annertussusai ingerlanneqarnissaalu pillugit paasissutissanik imaqaassapput. Pitsaassutsinut piunasaqaatinut aalajangersarneqartunut qanoq isilluni malitseqartitsisoqassanersoq kommunalbestyrelsip aalajangiiffigissavaa.

*Imm. 2.* Kommunalbestyrelsip Inatsisartut inatsisaat manna malillugu tapersiinerisa tamarmik imaluunniit aalajangersimasumik suussuseqartut piviusunngortinneqarnerannut pitsaassusissanik aalajangersaasoqassanersoq pillugu kommunalbestyrelse aalajangiisinnaavoq.

*Imm. 3.* Imm. 1 aamma 2 malillugit pitsaassutsimut piunasaqaatit allaganngorlugit suliarineqassapput. § 91 malillugu immikkut taamatullu inunnut innarluutilinnut politikip ilaatut, kommunip nittartagaani tamanut ammasumik saqqummiussisoqassaaq. Pitsaassusissanut piunasaqaatit ilisimatitsissutitut Naalakkersuisunut nassiunneqassapput.

*Imm. 4.* Imm. 1 aamma 2 malillugit pitsaassutsimut piunasaqaatit pisariaqartitsineq malillugu aammalu minnerpaamik ukioq allortarlugu kommunalbestyrelsip kukkunersiortassavai.

*Imm. 5.* Imm. 1 malillugu pitsaassutsimut piunasaqaatit ilusaat imarisaallu pillugit maleruagassanik erseqqinnerusunik Naalakkersuisut aalajangersaasinnaapput.

#### *Kinguaassiuutit atoqatigiinnerlu pillugit politiki*

**§ 94.** Inunnut innarluutilinnut najugaqarfii kinguaassiuutit aamma kinguaassiuutitigut atorerlunneqarneq pillugit kinguaassiuutinut ersarissumik takuneqarsinnaasumillu politikissamut oqaasertaliissapput. Kinguaassiuutinut politikeqarneq atoqatigiittarnerup inuup kinaagaluartup inuuneranut immikkullu pisariaqartitaanut ilaalluinnartuunerisa paasineqarnissaanut tapeeqataassaaq. Kinguaassiuutinut politikeqarneq inunnut innarluutilinnut atorerluisarnernut pinaveersaartitsiffiussaaq.

*Imm. 2.* Kinguaassiuutinut politikeqarneq ilaatigut makkuninnga imaqaassaaq:

1) Peqqinnartumik kinguaassiuutitigut inooqatigiinnikkullu inuuneqarnissaaq pillugu inunnut innarluutilinnut siunnersuisarneq ilitersuisarnerlu.

- 2) Naartunaveersaatit pillugit siunnersuisarneq ilitsersuisarnerlu.
  - 3) Kinguaassiuutitigut atoqatigiinnissamut akuersisarneq pillugu siunnersuisarneq ilitsersuisarnerlu.
  - 4) Inuup killiliisinnaanera pillugu siunnersuisarneq ilitsersuisarnerlu.
  - 5) Inunnut innarluutilinnut, najugalinnut allanut sulisunullu qaninngoornissamut kinguaassiuutitigullu pissusilersornissamut killiliinerit allat pillugit.
  - 6) Najugaqarfiit neqeroorutit kinguaassiuutitigut atornerluisarnerit pinaveersaartinnissaannut suliniutai.
  - 7) Najugaqarfiit neqeroorutit kinguaassiuutitigut atornerluinernut ilisimasaqalernerani imaluunniit pasitsaassaqarnerani suliniutissat tassangaannartut.
  - 8) Atornerluinerup nalunaarutigisarnera imaluunniit kalleriutigisarnera.
  - 9) Atornerlugaanermut eqqugaasumut sulisut allallu sulisut ilisimasallit tapersersuisarnerat.
  - 10) Inuk innarluutilik kinguaassiuutitigut atornerlunneqarsimanersoq pillugu ilisimalikkanik imaluunniit pasitsaassinernik peqartoqalersillugu iliuuseqarneq.
- Imm. 3.* Inuk innarluutilik kinguaassiuutitigut atornerlunneqarsimanersoq pillugu ilisimalikkanik imaluunniit pasitsaassinernik peqartoqalersillugu iliuuseqarneq pillugu Naalakkersuisut malittarisassanik erseqqinnerusunik aalajangersaasinnaapput.

## **Kapitali 14**

### *Aningaasalersuineq aamma akigititanik naleqqussaasarneq*

#### *Aningaasalersuineq*

**§ 95.** Inatsisartut inatsisaat manna malillugu inunnut innarluutilinnut tapersiinerlut inangaasartuutit kommuninit akilerneqassapput.

*Imm. 2.* Inatsisartut inatsisaat manna malillugu ulloq unnuarlu neqeroorutit pilersinneqarnerannut ingerlanneqarnerannullu attuumassuteqartut Naalakkersuisunit akilerneqartassapput.

*Imm. 3.* § 96 malillugu ulloq unnuarlu neqeroorutit ingerlanneqarnera kommunit akigititanut akiliutai aqutugalugit aningaasalersorneqassaaq.

*Imm. 4.* Inatsisartut inatsisaat manna malillugu kommunit tamarmik immikkut namminneq najugaqatigiiffiutiminnik aamma najugaqarfiutiminnik illersugaasunik pilersitsinerminnut ingerlatsinerminnullu aningaasartuutit akilertassavaat.

*Imm. 5.* Inuk innarluutilik Kalaallit Nunaanni oqartussaasut tapersiinissamut iliuuseqarnerisigut Kalaallit Nunaata avataani inissinneqarsimappat, Inatsisartut inatsisaat manna malillugu tapersiinerlut aallartinneqartumut aningaasartuutinut atatillugu iliuuseqartussaataaneq aamma utertillugit akiliisarneq pillugit maleruagassanik erseqqinnerusunik Naalakkersuisut nunatsinni ingerlatsivinni oqartussat allat isumaqatigalugit aalajangersaasinnaapput.

*Akigititanik naleqqussaasarneq*

**§ 96.** Kommunalbestyrelsep inissiisup inuk innarluutilik § 29 naapertorlugu ulloq unnuarlu neqeroorummi najugaqarneranut ulloq unnuarlu inissiinermut aki aalajangerneqartoq akilissavaa.

*Imm. 2.* Ulloq unnuarlu inissiinermut akit kommunalbestyrelsep imm. 1 naapertorlugu akiligassaa imatut aalajangerneqassaaq akip akip akilerneqartup tamarmiusup ulloq unnuarlu neqeroorutip ingerlatsinermut aningaasartuutai matussuserneqarsinnaallutik.

*Imm. 3.* Akimik aalajangiinermi inuup innarluutillip § 29 naapertorlugu ulloq unnuarlu neqeroorummi najugaqarnerani allatut ingerlanneqarsinnaanngitsunik ulluinnarni ingerlatsinissanut paarineqarnissamulluunniit, isummersorneqarnissamut katsorsarneqarnissamilluunniit immikkut ilisimasalinnik tapersersorneqarnissamik pisariaqatitai aallaavigineqassapput:

- 1) sulisunit sulisut,
- 2) ulloq unnuarlu neqeroorummi najugaqartunut immikkut sulisuusinnaasut,
- 3) nerisaqarneq najugaqarnerlu,
- 4) meeqaamat inersimasumullu innarluutilimmut siusinaartumik, soraarnerussutisiaqanngitsumut utoqqalinersiaqanngitsumullu aningaasat kaasarfimmiussat atisarsiniutissallu
- 5) sunngiffimmit sammisaqarnerit, aamma
- 6) Kalaallit Nunaanni avataanilu nuannaariarnerit angalanerillu

*Imm. 4.* Ulloq unnuarlu neqeroorutip akit Naalakkersuisunit aalajangerneqartut ukiumullu ataasiarluni aaqinneqartartut akilissavai. Kaasarfimmiussat atisassarsiuutissallu imm. 3 naapertorlugu ulloq unnuarlu akimi ilaasut.

*Imm. 5.* Imm. 2 naapertorlugu aki ukiumoortumik 1. januar aaqinneqartarpoq aammalu aningaasanut inatsimmi atuuttumi akit akissarsiallu aaqqinnerannut aki (aki (PL) assigalugu.

*Imm. 6.* Ulloq unnuarlu neqeroorummut nutaamik pilersinneqartumut aki aamma imm. 1 naapertorlugu akinik aalajangikkanik allannguinerit Naalakkersuisut kommunalbestyrelsellu imaluunniit kommunit ataatsimoorlutik sinniisuisa akornanni ukiup ingerlanerani isumaqatigiinniutigineqartassapput.

*Imm. 7.* Naalakkersuisut imm. 1 naapertorlugu ulloq unnuarlu neqeroorummi najugaqarnermut aki, nittartitakkami nalunaarutit.gl Akinik allattuiffik – Isumaginninnermi akit ukioq akit atuutilersinneqarnissaat sioqqullugu kingusinnerpaamik 15. November tamanut saqqummiuttassavaat.

**§ 97.** Inatsisartut inatsisaat manna naapertorlugu akigititat aalajangersaaffigineqartut ukiumut ataasiarlutik naleqqussarneqartassapput.

*Imm. 2.* Akigititanik aalajangersaaneq Akigititanut quppersagaq – Isumaginninnermi akigititat-ni quppernermit nalunaarutit.gl-ikkut ukiup siuliani kingusinnerpaamik 15. novembari Naalakkersuisunit saqqummiunneqartarput.



### **Kapitali 13**

#### *Naammagittaalliuut*

**§ 98.** Kommunalbestyrelsep Inatsisartut inatsisaat una malillugu aalajangiisarneri isumaginnittoqarfiup aqunneqarnera aaqqissuussaanelu pillugit Inatsisartut peqqussutaanni aalajangersakkat malillugit Isumaginninnermi Naammagittaalliuuteqartarfimmut naammagittaalliuutigineqarsinnaapput, taamaattoq inunnut ataasiakkaanut suliat pinnagit, takuuk § 59, stk. 2, § 60, stk. 1, § 61, § 62, stk. 5 og § 63, stk. 2.

*Imm. 2.* Inuk innarluutilik imaluunniit taassuma suliami sinniisuutitaa, matumani § 12 malillugu, illersorti ilanngullugu, naammagittaalliummik imm. 1 malillugu suliakkiinissaq pillugu Pissarsarfimmiit siunnersorneqarnissamik ilitsersorneqarnissamillu qinnuteqarsinnaavoq.

### **Kapitali 14**

#### *Aalajangersakkat allat*

**§ 99.** Ulloq unnuarlu neqeroorut Naalakkersuisunut ukiut tmaasa nalunaarusiamik tunniussisassaaq.

*Imm. 2.* Naalakkersuisut kingusinnerpaamik Inatsisartut upernaakkut ataatsimiinneranni ataatsimoortumik ukiumoortumik nalunaarusiamik Inatsisartunut saqqummiussisassapput.

*Imm. 3.* Ukiumoortumik nalunaarusiornermut maleruagassanik erseqqinnerusunik Naalakkersuisut aalajangersaasinnaapput.

**§ 100.** Naalakkersuisut ulloq unnuarlu neqeroorutitut suliassaqarfimmi ineriartortoqarnissaanut periusissiamik nutaamik ukiut marlukkaarlugit ukiumut ataasiarlutik suliaqassapput nunalu tamakkerlugu periusissiamut siusinnerusumut malitseqartitsissallutik.

*Imm. 2.* Periusissiami makku pineqarput:

- 1) Periusissiamut siusinnerusumut malitseqartitsineq.
- 2) Ulloq unnuarlu neqeroorummik pilersitsineq matusinerlu.
- 3) Ulloq unnuarlu neqeroorutini ataasiakkaani sullinniarneqartut kiisalu tassani allannguuteqartitsinissamik kissaatigineqartut.
- 4) Ulloq unnuarlu neqeroorutitut innersuussisarneq pillugu kommunimik suleqateqarneq, matumani najugaqaqatigiiffinnik aamma najugaqarfinnik illersugaasunik suleqateqarneq ilanngullugit.

*Imm. 3.* Ulloq unnuarlu neqeroorutini pisortat, soqutigisaqaqatigiiffiit attuumassuteqartut kiisalu kommunalbestyrelsit Naalakkersuisut periusissanik suliaqarnerminni akuutissavaat.

**§ 101.** Kommunit Naalakkersuisullu Inatsisartut inatsisaata matuma atornissaanut pisortani IT-qarnermut atortumik ataatsimoorussamik atuissapput.

*Kisitsisitigut paasissutissat*

**§ 102.** Kommunalbestyrelse kisitsisitigut paasissutissanik ukiumoortumik Naalakkersuisunut nalunaaruteqassapput, ilaatigut.

1) Inuit Inatsisartut inatsisaat manna malillugu ikiorsiissutinik pisartagaqartut amerlassusaat, ukiunut, siuaassutsinut najugaqarfinnullu agguarlugit, kiisalu tapersiissutinut aamma Kalaallit Nunaata avataani ikiorsiissutinut inissiinernullu agguarlugit.

2) Misileraalluni aaqqissuussinerit.

*Imm. 2.* Kommunalbestyrelse kisitsisinik paasissutissanik assigisaanillu Naalakkersuisut piumasarisaannik nassiussinissamik pisussaaffeqarpoq.

*Pineqaatissiisarnerit pillugit aalajangersakkat*

**§ 103.** Inatsisartut inatsisaanni matumani aalajangersakkat naapertorlugit kommunalbestyrelsip oqartussatut pisussaaffimi naammassinissaat annertuumik imaluunniit arlaleriarluni sumiginnarpagu imaluunniit mianersuaalliorfigippagu, Naalakkersuisut kommunalbestyrelse pinngitsaaliissutinik akilersuinissamik pisussaaffilersinnaavaa, matumani ullormut akiliisitsinerit ilanngullugit.

*Imm. 2.* Inatsisartut inatsisaat manna tunngavigalugu pinngitsaaliissummik akiliisinneqarnermi akiliutit Nunatta Karsianut nakkartinneqassapput.

*Misileraalluni aaqqissuussinerit*

**§ 104.** Naalakkersuisut kommunalbestyrelsimiit inassuteqartoqareerneratigut tapersersuinissamut periarfissat aamma ulloq unnuarlu neqeroorutit pillugit kommunini misileraalluni aaqqissuussinerit akuersissutigisinnaavaat.

*Imm. 2.* Kommunimi misileraalluni aaqqissuussineq sivisunerpaamik ukiuni pingasuni atuussinnaavoq.

*Imm. 3.* Kommunimi misileraalluni aaqqissuussinermut atatillugu, imm. 1 takuuk, ukiut tamaasa kommunalbestyrelse nassuiaammik suliaqartassaaq taannalu Naalakkersuisunut tunniunneqassaaq.

**§ 105.** Kommunalbestyrelsimit qinnuteqartoqareerneratigut kommunalbestyrelsip tapersersuinernik allanik tunniussisarnissaa Naalakkersuisut akuersissutigisinnaavaat, inissanullu neqeroorutininik assigiinngitsunik pilersitsisinnaalluni.

*Imm. 2.* Akuersissuteqarnermi misileraanermik aaqqissuussap nakkutigineqarnissaanut aalajangiisinnaatitaaneq pillugu aalajangersakkanik Naalakkersuisut aalajangersaasinnaapput.

**Kapitali 15**

*Atortuulersitsinermi, atorunnaarsitsinermi aamma ikaarsaariarnermi aalajangersakkat*

**§ 106.** Inatsisartut inatsisaat una ullormi 1. januaari 2026-mi atuutilersinneqassaaq.

*Imm. 2.* Tassunga peqatigitillugu uku atorunnaarsinneqarput:

- 1) Inatsisartut inatsisaat nr. 13, 12. juuni 2019-imeersoq
- 2) Inuit innarluutillit tapersorsorneqarnissaannut Inatsisartut inatsisaata allanngortinneqarnera pillugu Inatsisartut inatsisaat nr. 5, 19 novembari 2021-meersoq atorunnaarsinneqarput (Inuit innarluutillit eqqartuussut tunngavigalugu imaluunniit eqqartuussiviup aalajangerneratigut inissinneqarsimasut akiliunneqarlutik tikeraarlutik angalasinnaatitaanngillat).

*Imm. 3.* Allaffissornikkut najoqqutassat Inatsisartut inatsisaanni taaneqartumi imm. 2, nr. 1-imi tunngavilerneqarlutik aalajangersarneqartut maleruagassanik Inatsisartut inatsisaanni matumani imaluunniit Inatsisartut inatsisaanni allani tunngaveqarlutik najoqqutassaqarnikkut tunngavilerneqartut taarsernissaat atorunnaarsinnissaalluunniit tikillugit atuutiinnassapput.

*Imm. 4.* Utoqqalinersiaqarneq pillugu Inatsisartut inatsisaat nr. 20, 23. novembari 2015-imeersumi § 16 atorunnaarsinneqarpoq.

*Namminersorlutik Oqartussat, ulloq xx. xxx 2024*

Naalakkersuisut Siulittaasuat